

東坡全集卷之三十六  
顯見轉至陳惡兼聞本州管下村坊客戶見今實  
闕餽糧其上等人戶雖各有田業緣值災傷亦甚  
闕食難以賑濟況客戶乃主戶之本若客戶闕食  
流散主戶亦須荒廢田土矣今相度欲望朝廷詳  
酌特降指揮下定州將兩界見在陳損白米二萬  
餘石分給借貸與鄉村第一等第二等主戶喫用  
令上件兩等人戶據客戶人數不限石斛依此保  
借候向去豐熟日依元糴例並令送納十分好白  
米入官不惟乘此饑年人戶闕食優加賑濟又使  
官中却得新好白米充軍糧支遣及免年深轉至  
損壞盡爲土壤如以爲便卽乞速賜指揮行下謹  
錄奏聞伏候敕旨

貼黃今來已是春深正當春夏青黃不交之際  
可以發脫上件陳米斛斛公私俱便若失此時  
則人戶必不願請不免守支積年化爲糞壤乞  
斷自朝廷早賜指揮入急遞行下更不下有司  
往復勘會今來所乞借貸皆是臣與官吏體問  
上戶願得此米以濟佃戶將來必無失陷與尋  
常賑貸一例支與貧下戶人催納費力事體不  
同乞早賜行下





東坡全集卷之三十六

三



東坡先生全集卷之三十七

奏議

乞降度牒修北嶽廟狀

紹聖元年三月日端明殿學士兼翰林侍讀學士  
左朝奉郎知定州蘇軾狀奏右臣伏見定州曲陽  
縣北嶽安天元聖帝廟建造年深屋宇頽弊自熙  
寧間因守臣薛向奏請止曾完葺正殿自餘諸殿  
及廊廡門宇墻垣久已疎漏破損前後累有守臣  
監司奏陳乞給賜錢或降度牒修完皆准省符止  
令依條以施利錢物克用緣近歲民間屢值災歉



施利微薄只了得遞年逐旋些小修補後來劉奉世又乞依薛向例於安撫司回易息錢內支錢三千貫助修嶽廟亦不蒙朝廷允許深慮摧壞日多爲費滋大今據定州申檢計到合用工料價錢三千三百餘貫乞降空名度牒一十五道賣錢支用如朝廷不許降度牒卽本廟有銀器一千三百餘兩別無使用欲乞依令出賣收買材植臣契勘土件銀器元係朝廷給賜以備供神之物若行出賣恐於事體有損況所費錢數不多欲望聖慈特依定州所乞數目給降度牒付本州出賣應副修造庶得廟宇稍完不致破壞仍令本州通判兩員更互到彼提舉催促務要早令了畢上副朝廷崇奉之意謹錄奏聞伏候敕旨

貼黃臣伏以朝廷崇奉五嶽禮極嚴備凡有祈禱多獲感應今北嶽廟見弊陋埋當完葺蓋所用度牒道數至少伏望特賜指揮施行庶稱朝廷尊事嶽廟之意

上皇帝書

臣軾謹昧死再拜皇帝陛下臣伏以今月初五日南至文武百僚入賀所以賀一陽來復也謹按易



復卦雷在地中復先王以至日閉關商旅不行后  
不省方說易者曰乾六陽之氣也爲十一月爲十  
二月爲正月爲二月爲三月爲四月而乾之陽復  
矣陽極則陰生陰生則夏至矣坤六陰之氣也爲  
五月爲六月爲七月爲八月爲九月爲十月而坤  
之陰極矣陰極則陽生陽生則冬至矣自太極分  
爲二儀二儀分爲四象四象分爲十二月十二月  
分爲三百六十五日五日爲一候分爲七十二候  
三候爲一氣分爲二十四氣上爲日月星辰下爲  
山川草木鳥獸蟲魚不出此陰陽之氣升降而已

惟人也全天地十干之氣十月而成形故能天能  
地能人一消一息一呼一吸晝夜與天地相通差  
舛毫忽則邪沴之氣干之矣故於冬至一陽之生  
也五陰在上五陽在伏而一陽初生於伏之下其  
氣至微其兆細縕可以靜而不動可以嗇養而不  
可以發宣故乾之初九爻曰潛龍勿用孔子曰陽  
在下也言陽氣方潛於下未可以用也先王於是  
日閉關商旅不行后不省方關者門戶所由以關  
闕也商旅者動以利心也后者凡居人上者謂之  
羣后所以治事者也方者事也門戶不開則微陽



東坡全集卷之三十一  
閉而不出也利心不動則外物感而不應也方事  
不省則視聽收而不發也先王奉若天道如此之  
密用之於國則安靜而不勞用之於身則冲和而  
不竭昔者伏羲神農黃帝堯舜皆得此道臣敢因  
至日以獻伏乞聖慈留神省覽實社稷無疆之福  
任兵部尚書乞外郡劄子

臣向在揚州蒙恩除臣今任臣於本州及緣路附  
遞入文字辭免准聖旨劄子指揮爲已差克鹵簿  
仗大禮日迫不許遷延臣以此不敢堅辭尋於南  
京附遞奏乞候過南郊依前除臣一郡今來已過

止  
郊禮乞檢會累次奏狀除官知越州一次取進

### 辭兩職并乞郡劄子

臣近奏乞越州伏蒙聖恩降詔不允續准閣門告  
報已除臣端明殿學士兼翰林侍讀學士守禮部  
尚書聞命悸恐不知所措臣本以寵祿過分衰病  
有加故求外補實欲自便而榮名驟進兩職荐加  
不獨於臣有非據之羞亦恐朝廷無以待有勞之  
士豈徒內愧必致人言伏望聖慈特賜追寢仍乞  
檢會前奏除臣一郡若越州無闕乞自朝廷除授



東坡全集卷之三十一  
四  
取進止

第二劄子

臣近奏乞辭免端明殿學士兼翰林侍讀學士守禮部尚書恩命仍乞檢會前奏除臣一郡蒙降詔不允聖恩隆厚天旨丁寧顧臣何人敢守微意但本緣請外更蒙陞擢兼帶兩職近歲所無有何勞能被此光寵欲乞追寢新命令臣且依舊供職則臣更不敢請郡若朝廷必欲臣受此職名卽乞除臣一重難邊郡令臣盡力報稱猶可少安臣非敢自謂知兵若朝廷有開邊伐國之謀求深入攻之帥則非臣所能辦若欲保境安民宣布威信使吏士用命無所失亡則承乏之際猶可備數伏望朝廷於此二者擇一以處臣非獨在臣分義當然亦朝廷名器不爲虛授取進止

辭免兼侍讀劄子

臣近准閣門告報已降告命除臣兼侍讀者臣以迂愚本無學術出從吏役益復空疎竊位禁林已難久處而況天縱之學已集大成非臣孱微所可仰望伏望聖慈追寢成命以授能者所有告命未敢祇受取進止



東坡全集卷之三十一  
赴英州乞舟行狀

臣軾言近准誥命落兩職追一官謫守嶺南小郡  
臣尋火急治裝星夜上道今已行次滑州而自聞  
命已來憂悸成疾兩目昏障僅分道路左手不仁  
右臂緩弱六十之年頭童齒豁疾病如此理不久  
長而所負罪名至重上孤恩義下愧平生悸傷血  
氣憂隔飲食所以疾病有加無瘳加以素來不善  
治生祿賜所得隨手耗盡道路之費囊橐已空臣  
本作陸行日夜奔馳速於赴任而疾病若此資用  
不繼英州接人卒未能至定州送人不肯前去雇

人買馬之資無所從出道盡塗窮譬如中流失舟  
抱一浮木恃此爲命而木將沉臣之衰危亦云極  
矣竊伏思念得罪以來三改謫命聖恩保全終付  
一郡豈期聖主至仁至明尚念八年經筵之舊臣  
意欲全其性命乎臣若強衰病之餘生犯三伏之  
毒暑陸走炎荒四千餘里則僵仆中途死於逆旅  
之下理在不疑雖罪累之重不足多惜而死非其  
道則非仁聖不殺全育之意也輒已分散骨肉令  
長子帶往近地躬耕就食臣只帶家屬數人前去  
汴泗之間乘舟泛江倍道而行至南康軍出陸赴



任所貴醫藥粥食不至大段失所臣切揣自身多病早衰氣息僅屬必無生還之道然尚延晷刻於舟中畢餘生於治所雖以瘴癘死於嶺表亦所甘心比之陸行斃於中道藁葬路隅常爲羈鬼則猶有間矣恭惟聖主之德下及昆蚩以臣曾經親近任使必不欲置之死地所以輒爲舟行之計敢望天慈少加憫惻臣無任

乞越州劄子

臣自去歲蒙恩召還卽時奏乞越州蓋爲臣從仕以來三任浙中粗知士俗所宜易於爲政又以老病日加切於歸休舊有薄田在常州宜興縣久荒不治欲因赴任到彼少加完葺以爲歸計越雖僻陋在臣安便及近者蒙恩知定州雖寵眷隆異而自早衰多難心力疲耗實非所堪但以求州得州若便辭免是有揀擇所以施強拜命今復念定雖重鎮了無邊警事權雄重祿賜優厚若辭定乞越於義無嫌伏望聖慈察臣至情特賜改差臣越州一次則公私皆便臣不勝幸甚取進止

再薦趙令時狀

任兵部尚書日

右臣昨知潁州曾薦簽書本州節度判官廳公事



東坡全集卷之三十一  
趙令時乞置之館閣至今未蒙施行其人近已替  
罷旦夕赴闕朝見計其所養必不肯同衆人奔走  
干請恐政府大臣無緣得知其所學今繕寫趙集  
平日與臣詩文三軸進呈伏望聖慈清宴之暇一  
賜觀覽必有可取然後付之三省近臣考其人才  
亦足以副神考教養宗子之意謹具聞奏

論浙西閉糴狀

本路今歲不熟初水後旱早晚俱傷高下並損已  
具事由聞奏去訖勘會本路唯蘇湖常秀等州出  
米浩瀚常飽數路漕輸京師自杭睦以東衢婺等

州請之上鄉所產微薄不了本庄所食里諺云上  
鄉熟不抵下鄉一鍋粥蓋全仰蘇秀等州商旅販  
運以足官私之用今來雖一例災傷而蘇秀等州  
所產終是滂沛訪聞逐州例皆閉糴嚴立賞罰不  
許米斛出境是致杭州常平省倉糴買不行民亦  
闕食見今粳米已至八九十足錢尋具牒蘇秀等  
州不得閉糴訪問逐州雖承受本司指揮依舊閉  
糴尋差識字公人陳宥往秀州抄錄到所出榜示  
二本其大略云如有諸色人擡價買米販往別州  
許人告捉立定賞多者至五十貫兼取問得杭州



東坡全集卷之三十一  
米行人狀稱因逐州見今立賞告捉私販全無米  
船到州認是逐州官吏堅意閉糴本司無緣止絕  
若商旅不行米貴不已公私窘乏盜賊之類何所  
不有以此合係本司知管除已牒轉運提刑同外  
須至聞奏者

右本司訪聞得浙中父老皆言熙寧七八年兩浙  
災傷人死大半當時雖係天時不熟亦是本路監  
司郡守如張靚沈起之流處置乖方助成災變既  
無方略賑濟惟務所在閉糴蘇秀等州米斛既不  
到杭杭州又禁米不得過浙東是致人心驚危有

停塌之家亦皆深藏固惜不肯出糶民有衣被罷  
紈戴佩珠金而米不可得斃於道路不可勝數流  
殍之變古今罕聞伏望仁聖痛加哀憐曲賜過慮  
體念今來浙中雖未是大段凶年只恐官吏有失  
措置漸成災患所憂不小若商旅不行米貴不已  
農夫闕食春夏之交無力種則明年災傷公私並  
竭不知何以待之伏望聖慈深以熙寧之事爲鑑  
嚴賜指揮本路監司多方擘畫安之於未動救之  
於未危仍乞指揮速行止絕逐州閉糴所貴杭睦  
衢婺等州不至全然乏食謹錄奏聞伏候勅旨



再論閉糶狀

本路災傷本司已兩次奏聞竊見比年以來京東河北淮南等處災傷並蒙朝廷支賜錢米或於他路截撥斛斗賑救數目至廣今來本路災傷不敢便望支賜截撥只乞稍寬轉運司年額上供使得轉換擘畫多方救卹已於十一月十日奏乞至今未奉指揮數內一事蘇湖常秀等州見今米商全不通行不唯逐州立賞閉糶亦爲逐處稅務承例遣條收米斛力勝稅錢是致商旅筭計腳錢本重無由興販檢會元祐編敕諸興販斛斗及以柴炭

草木博糧食者並免納力勝稅錢注云舊收稅處依舊例卽災傷地分雖有舊例亦免本司看詳本路見今災傷正合施行上條已牒諸州施行仍散榜轄下城郭鄉村外深慮逐處稅務自來收米斛力勝處指爲課額今來雖係災傷合依上條放免至年終比較日轉運司不容如此分說有虧欠折遭責罰須至奏請者

右伏望聖慈愍念本路災傷及前件放免力勝條貫係今來合行事件特賜指揮轉運司將來年終比較日除米斛力勝一項稅額權免比較科罰候



東坡全集卷之三十七  
將來豐熟日依舊所貴商旅通行場務亦免罪責  
謹錄奏聞伏候勅旨

乞允文彥博等辭免拜劄子

臣近奉聖旨撰賜文彥博呂公著今後入朝免拜  
詔書今又准內降指揮撰不允彥博辭避免拜批  
答臣謹按禮經八十拜君命一坐再至所謂拜君  
命者傳命而拜非朝見也然且不免周天子賜齊  
桓公胙曰伯父耄老無下拜公曰天威不遠顏咫尺下拜登受所謂無下拜者拜於堂上非不拜也然且不敢鍾繇以足疾乘車就坐疑若不拜然亦

無明文君前乘車豈足爲法而馬燧延英不拜蓋  
是臨時優禮無今後遂不復拜之文祖宗舊例如  
呂端之流以老病進對亦止於臨時傳宣不拜今  
來彥博公著今後免拜指揮自是朝廷優賢貴老  
度越古今無可議者但臣是有司合守典禮兼恐  
彥博公著終不敢當以臣愚見不若允其所請若  
聖恩優閔老臣眷眷不已過其朝見間或傳宣不  
拜足以爲非常之恩臣忝備侍從懷有所見不敢  
不盡所有不允批答臣未敢撰取進止

御寶批依  
奏脩撰允

所請批  
答入進



乞允安燾辭免轉官劄子

臣今日八月准內批安燾辭免轉右光祿大夫劄子降詔不許臣竊謂人主之馭羣臣專於禮義廉耻若使受無名之寵則爲待臣子之輕今朝廷豈以執政六人五人進用故加遷秩以慰其心燾位冠西樞委寄至重豈肯見人擢用卽以介懷旣無授受之名僅以姑息之政縱有先朝故事亦是一時誤恩今燾力辭正爲知義臣欲奉命草詔不知所以爲詞伏望聖慈從其所請若除受別有緣故卽乞明降指揮苟於義稍安敢不撰進取進止

批可且用一意度作不許辭免詔書進入

乞允宗晟辭免起復恩命劄子

臣今日準中書省批送到宗晟辭免起復恩命劄子奉聖旨送學士院降詔不允謹按宗晟飭行有素持喪中書所辭恩命已四不允而宗晟確然固守其辭愈哀且日念臣執喪報親之日短致命殉國之日長出于至誠可謂純孝臣謂宗晟未經祥練之變且無金革之虞孝治之朝宜聽所守因以風厲宗室庶皆守禮篤親顧不美哉若以宗正之任恐難其人亦當差官權攝須其從吉復以命之



臣忝備禁從不敢不言所有不允詔書臣未敢撰  
取進止

代張方平諫用兵書

熙寧十年

臣聞好兵猶好色也傷生之事非一而好色者必  
死賊民之事非一而好兵者必亡此理之必然者  
也夫惟聖人之兵皆出於不得已故其勝也享安  
全之福其不勝也必無意外之患後世用兵皆得  
已而不已故其勝也則變遲而禍大其不勝也則  
變速而禍小是以聖人不計勝負之功而深戒用  
兵之禍何者興師十萬日費千金內外騷動怠於

道路者七十萬家內則府庫空虛外則百姓窮匱  
饑寒逼迫其後必有盜賊之憂死傷愁怨其終必  
致水旱之報上則將帥擁衆有跋扈之心下則士  
衆久役有潰叛之志變故百出皆由用兵至於興  
事首議之人冥謫尤重蓋以平民無故緣兵而死  
怨氣充積必有任其咎者是以聖人畏之重之非  
不得已不敢用也自古人主好動干戈由敗而亡  
者不可勝數臣今不敢復言請爲陛下言其勝者  
秦始皇旣平六國復事吳越戍役之患被於四海  
雖拓地千里遠過三代而墳土未乾天下怨叛二



東坡全集卷之三十一  
世被害子嬰被擒滅亡之酷自古所未嘗有也漢武帝承文景富溢之餘首挑匈奴兵連不解遂使侵尋及於諸國歲歲調發所向成功建元之間兵禍始作是時蚩尤旗出長與天等其春戾太子生自是師行三十餘年死者無數及巫蠱事起京師流血僵尸數萬太子父子皆敗班固以爲太子生長於兵與之終始帝雖悔悟自克而歿身之恨已無及矣隋文帝旣下江南繼事夷狄煬帝嗣位此心不衰皆能誅滅強國威震萬里然而民怨盜起三不旋踵唐太宗神武無敵尤喜用兵旣已破滅

突厥高昌吐谷渾等猶且未厭親駕遼東皆志在立功非不得已而用其後武氏之難唐室凌遲不絕如綫蓋用兵之禍物理難逃不然太宗仁聖寬厚克已裕人幾至刑措而一傳之後子孫塗炭此豈爲善之報也哉由此觀之漢唐用兵於寬仁之後故其勝而僅存秦隋用兵於殘暴之餘故其勝而遂滅臣每讀書至此未嘗不掩卷流涕傷其計之過也若使此四君者方其用兵之初隨即敗衄惕然戒懼知用兵之難則禍敗之興當不至此不幸每舉輒勝故使徃於功利慮患不深臣故曰勝



東坡全集卷之三十一  
則變遲而禍大不勝則變速而禍小不可不察也  
昔仁宗皇帝覆育天下無意於兵將士惰偷兵革  
朽鈍元昊乘間竊發西鄙延安涇原麟府之間敗  
者三四所喪動以萬計而海內晏然兵休事已而  
民無怨言國無遺患何者天下臣庶知其無好兵  
之心天地鬼神諒其有不得已之實故也今陛下  
天錫勇智意在富彊卽位以來繕甲治兵伺候鄰  
國羣臣百寮窺見此指多言用兵其始也弼臣執  
國命者無憂深思遠之心樞臣當國論者無慮害  
持難之識在臺諫之職者無獻替納忠之議從微

至著遂成厲階既而薛向爲橫山之謀韓絳效涇  
入之計陳升之呂公弼等陰與之協力師徒喪敗  
財用耗屈較之寶元慶曆之敗不及十一然而天  
怒人怨邊兵背叛京師騷然陛下爲之盱食者累  
月何者用兵之端陛下作之是以吏士無怨敵之  
意而不直陛下也尚賴祖宗積累之厚皇天保佑  
之深故使兵出無功感悟聖意然淺見之士方且  
以敗爲耻力欲求勝以稱上心於是王韶構禍於  
熙河章惇造釁於橫山熊本發難於渝瀘然此等  
皆戕賊已降俘纍老弱困弊腹心而取空虛無用



東坡全集卷之三十一  
之地以爲武功使陛下受此虛名而忽於實禍勉  
強砥礪奮於功名故沈起劉彝復祭於安南使十  
餘萬人暴露瘴毒死者十而五六道路之人斃於  
輸送貲糧器械不見敵而盡以爲用兵之意必且  
少衰而李憲之師復出於洮州矣今師徒克捷銳  
氣方盛陛下喜於一勝必有輕視四夷凌侮敵國  
之意天意難測臣實畏之且夫戰勝之後陛下可  
得而知者凱旋捷奏拜表稱賀赫然耳目之觀耳  
至於遠方之民肝腦屠於白刃筋骨絕於餽餉流  
離破產鬻賣男女薰眼折臂自經之狀陛下必不

得而見也慈父孝子孤臣寡婦之哭聲陛下必不  
得而聞也譬猶屠殺牛羊剝鱗魚鱉以爲饕餮食  
者甚美見食者甚苦使陛下見其號呼於挺刃之  
下宛轉於刀几之間雖八珍之美必將投筯而不  
忍食而況用人之命以爲耳目之觀乎且使陛下  
將卒精強府軍充實如秦漢隋唐之君旣勝之後  
禍亂方興尚不可救而況所在將吏罷軟凡庸較  
之古人萬萬不逮而數年以來公私窘乏內府累  
世之積掃地無餘州郡征稅之儲上供殆盡百官  
廩俸僅而能繼南郊賞給久而未辦以此舉動雖



東坡全集卷之二十一  
有智者無以善其後矣且饑役之後所在盜賊蠶  
起京東河北尤不可言若軍事一興橫歛隨作民  
窮而無告其勢不爲大盜無以自全邊事方深內  
患復起則勝廣之形將在於此此老臣所以終夜  
不寐臨食而歎至於慟哭而不能自止也且臣聞  
之凡舉大事必順天心天之所向以之舉事必成  
天之所背以之舉事必敗蓋天心向背之迹見於  
災祥豐歛之間今自近歲日蝕星變地震山崩水  
旱癘疫連年不解民死將半天心之向背可以見  
矣而陛下方且斷然不顧興事不已譬如人子得

過於父母惟有恭順靜思引咎自責庶幾可解今  
乃紛然詰責奴婢恣行箠楚以此事親未有見赦  
於父母者故臣願陛下遠覽前世興亡之迹深察  
天心向背之理絕意兵革之事保疆睦鄰安靜無  
爲固社稷長久之計上以安二宮朝夕之養下以  
濟四方億兆之命則臣雖老死溝壑瞑目於地下  
矣昔漢祖破滅羣雄遂有天下光武百戰百勝祀  
漢配天然至白登被圍則講和親之議西域請吏  
則出謝絕之言此二帝者非不知兵也蓋經變旣  
多則慮患深遠今陛下深居九重而輕議討伐老



東坡全集卷之三十一  
臣庸懦私竊以爲過矣然人臣納說於君因其既  
厭而止之則易爲力迎其方銳而折之則難爲功  
凡有血氣之倫皆有好勝之意方其氣之盛也雖  
布衣賤士有不可奪自非智識特達度量過人未  
有能勇於奮發之中舍已從人惟義是聽者也今  
陛下盛氣於用武勢不可回臣非不知而獻言不  
已者誠見陛下聖德寬大聽納不疑故不敢以衆  
人好勝之常心望於陛下且意陛下他日親見用  
兵之害必將哀痛悔恨而追咎左右大臣未嘗一  
言臣亦將老且死見先帝於地下亦有以藉口矣  
惟陛下哀而察之

代滕甫論西夏書

臣素無學術老不讀書每欲披竭愚忠上補聖明  
萬一而肝肺枯涸卒無可言近者因病求醫偶悟  
一事推之有政似可施行惟陛下財幸臣近患積  
聚醫云據病當下一月而愈若不下半年而愈然  
中年以後一下一衰積衰之患終身之憂也臣私  
計之終不以一月之快而易終身之憂遂用其言  
以善藥磨治半年而愈初不傷氣體力益完因悟  
近日臣僚獻言欲用兵西方皆是醫人欲下一月



而愈者也其勢亦未必不成然終非臣子深愛君  
父欲出萬全之道也以陛下聖明將賢士勇何往  
不克而臣尚以爲非萬全者俗言彭祖觀井自係  
大木之上以車輪覆井而後敢觀此言雖鄙而切  
於事陛下愛民憂國非特如彭祖之愛身而兵者  
凶器動有存亡其陷人可畏有甚於井故臣願陛  
下之用兵如彭祖之觀井然後爲得也臣竊觀自  
古用兵者莫如曹操其破滅袁氏最有巧思請試  
爲陛下論之袁紹以十倍之衆大敗於官渡僅以  
身免而操歛兵不追者何也所以緩紹而亂其國

也紹歸國益驕忠賢就戮嫡庶並爭不及八年而  
袁氏無遺種矣向使操急之紹旣未可以一舉蕩  
滅若懼而脩政用田豐而立袁譚則成敗未可知  
也其後北征烏丸討袁尚袁熙尚熙走遼東或勸  
操遂平之操曰彼素畏尚等吾今急之則合緩之  
則自相圖其勢然也遂引兵還曰吾方使公孫康  
斬送其首已而果然若操者可謂巧於滅國矣滅  
國大事也不可以速譬如小兒之毀齒以漸搖撼  
之則齒脫而小兒不知若不以漸一拔而得齒則  
毀齒可以殺兒故臣願陛下之取西夏如曹操之



取袁氏也方元昊強時謀臣猛將盡其智力十年而不敢近今者主弱臣強其國內亂陛下使偏師一出斬名王虜僞公主築蘭會等州此真千載一時天以此賊授陛下之秋也兵法有之同舟而遇風則胡越相救如左右手今秉常雖爲母族所篡以意度之其世家大族亦未肯俯首連臂爲此族用也今乃合而爲一堅壁清野以抗王師如左右手此正同舟遇風之勢也法當緩之今天威已震臣願陛下選用大臣宿將素爲賊所畏服者使兼帥五路聚重兵境上號稱百萬蒐乘補卒牛酒日五金鼓之聲聞於數百里間外爲必討之勢而實不出境多出金幣遣間使辯士離壞其黨與且下令曰尺土吾不愛一民吾不有也其有能以地與衆降者卽以封之有敢攘其地掠其人者皆斬不出一年必有權均力敵內自相疑者人情不遠各欲求全及王師之未出爭爲先降以邀重賞陛下因而分裂之卽用其酋豪命以爵秩棊布錯峙務使相仇如漢封呼韓邪通西域故事不過於要害處築一城屯數千人置一將以護諸部可使數百年內保境不煩城守餽運豈非萬全之至計哉



東坡全集卷之三十一  
臣願陛下斷之於中深慮而遠計之夫爲人臣計  
與爲人主計不同人臣非攘地效首虜無以爲功  
爲陛下計惟天下安社稷固否耳陛下神聖冠古  
動容舉意皆是功德但能措太山之安與天地等  
壽則竹帛不可勝紀而堯舜禹湯不足過也議者  
不知出此爭欲急於功名履危犯難以勞聖慮臣  
竊不取古人有言省功不如省事省事不如清心  
劉洎諫唐太宗曰皇天以不言爲貴聖人以不言  
爲德老子稱大辯若納莊子一言至道無文且多記  
則損心多言則耗氣心氣內損形神外勞初雖不  
覺後必爲累須爲社稷自愛人臣又君未有如洎  
之深至者也臣竊慕之雖謫守在外不當妄言然  
自念舊臣譬之老馬雖筋力已衰不堪致遠而經  
涉險阻粗識道路惟陛下哀愍其愚而憐其意不  
勝幸甚

代滕甫辯謗乞郡狀

臣聞人情不問賢愚莫不畏天而嚴父然而疾痛  
則呼父窮窘則號天蓋情發於中言無所擇豈以  
號呼之故謂無嚴畏之心今臣之所患不止於疾  
痛而所憂有甚於窮窘若不號呼於君父更將趨



東坡全集卷之二十一  
赴於何人伏望聖慈少加憐察

中謝

臣本無學術

亦無材能惟有忠義之心生而自許昔季孫有言見有禮於其君者事之如孝子之養父母也見無禮於其君者誅之如鷹鷂之逐鳥雀也臣雖不肖允蹈斯言但信道直前謂人如已旣蒙深知於聖主肯復借交於衆人任其蠢愚積成仇怨一自離去左右十有二年浸潤之言何所不有至謂臣陰黨反者故縱罪人若快斯言死未塞責切伏思宣帝漢之英主也以片言而誅楊惲太宗唐之興王也以單詞而殺劉洎自古忠臣烈士遭時得君而

不免於禍者何可勝數而臣獨蒙皇帝陛下始終照察愛惜保全則陛下聖度已過於宣帝太宗而臣之遭逢亦古人所未有日月在上更何憂虞但念世之憎臣者多而臣之賦命至薄積毀消骨巧言鑠金市虎成於三人投杼起於屢至儻因疑似復至人言至時雖欲自明陛下亦難屢赦是以及今無事之日少陳危苦之詞晉王導乃王敦之弟也而不害其爲元臣崔造源休之甥也而不廢其爲宰相臣與反者義同路人獨於寬大之朝爲臣終身之累亦可悲矣凡今游宦之士稍與貴近之



東坡全集卷之三十一  
人有葭葦之親半面之舊則所至便蒙異待人亦不敢交攻況臣受知於陛下中興之初效力於衆人未遇之日而乃毀訾不忌踐踏無嚴臣何足言有辱天眷此臣所以涕泣而自傷者也今臣旣安善地又忝清班非敢別有僥求更思錄用但患難之後積憂傷心風波之間怖畏成疾敢望陛下憫餘生之無幾究前日之異恩或乞移臣淮浙間一小郡稍近墳墓漸謀歸休異日復得以枯朽之餘仰瞻天日之表然後退伏田野自稱老臣追敘始終之遭逢以託鄉鄰之父老區區志願永畢於斯

伏願陛下憐其志察其愚而赦其罪臣無任感恩知罪激切屏營之至

代李琮論京東盜賊狀

元豐二年

右臣伏見自來河北京東常苦盜賊而京東尤甚不獨穿窬祛篋椎埋發塚之奸至有飛揚跋扈割據僭擬之志近者李逢徒黨青徐妖賊皆在京東凶愚之民殆已成俗自昔大盜之發必有釁端今朝廷清明四方無虞而此等常有不軌之意者殆土地風氣習俗使然不可不察也漢高帝沛人項羽宿遷人劉裕彭城人黃巢宛胸人朱全忠碭山



東坡全集卷之三十一  
人其於歷代豪傑出於東京者不可勝數故凶愚  
之人常以此藉口而其材力心膽實以過人加以  
近年改更貢舉條制掃除腐爛專取學術其秀民  
善士既以改業而其朴魯強悍難化之流抱其無  
用之書各懷不逞之意朝廷雖敕有司別立字號  
以收三路舉人而此等自以世傳朴學無由復踐  
場屋老死田里不入彀中私出怨言幸災伺隙臣  
每慮及此卽爲寒心楊雄有言御得其道則天下  
狙詐咸作使御失其道則天下狙詐咸作敵而班  
固亦論劇孟郭解之流皆有絕異之姿而惜其下

入於道德苟放縱於末流是知人之善惡本無常  
性若御得其道則向之奸猾盡是忠良故許子將  
謂曹操曰子治朝之能臣亂世之奸雄使韓彭不  
遇漢高亦與盜賊何異臣竊嘗爲朝廷計以謂窮  
其黨而去之不如因其材而用之何者其黨不可  
勝去而其材自有可用昔漢武嘗遣繡衣直指督  
捕盜賊所至以軍興從事斬二千石以下可謂急  
矣而盜賊不爲少衰者其黨固不可盡也若朝廷  
因其材而用之則盜賊自消而豪傑之士可得而  
使請以唐事明之自天寶以後河北諸鎮相繼僭



東坡全集卷之三十一  
三四  
亂雖憲宗英武亦不能平觀其主帥皆卒伍庸材  
而能於六七十年間與朝廷相抗者徒以好亂樂  
禍之人皆公死黨之士相與出力而輔之也至穆  
宗之初劉總入朝而河北始平總知河北之亂權  
在此輩於是盡籍軍中宿將名豪如朱克融之流  
薦於朝冀厚與爵位使北方之人羨慕向進革其  
亂心而宰相崔植杜元穎皆庸人無遠慮以爲河  
北旣平天下無事克融輩久留京師終不錄用饑  
寒無告怨忿思亂會張洪靖赴鎮遂遣還幽州而  
克融等作亂復失河朔今陛下鑑唐室旣徃之咎

嘗以京東河北豪傑之心臣伏見近日沂州百州  
程棐告獲妖賊郭進等竊聞棐之弟岳乃是李逢  
之黨配在桂州豪俠武健又過於棐京東州郡如  
棐岳者不可勝數此等棄而不用卽作賊收而用  
之卽捉賊其理甚明臣願陛下精選青鄆兩帥京  
東東西職司及徐沂交單濰密淄齊曹濮知州諭  
以此意使陰求部內豪猾之士或有武力或多權  
謀或通知術數而曉兵或家富於財而好施如此  
之類皆召而勸獎使以告捕自效籍其姓名以聞  
於朝所獲盜賊量輕重酌賞若獲真盜大奸隨卽



錄用若只是尋常劫賊卽累其人數酌以一官使此輩歆艷其利以爲進身之資但能拔擢數人則一路自然競勸貢舉之外別設此科則向之遺材皆爲我用縱有奸雄嘯聚亦自無徒但每州搜羅得一二十人卽耳目徧地盜賊無容足之處矣歷觀自古竒偉之士如周處戴淵之流皆出於羣盜改惡修善不害爲賢而況以捉賊出身有何不可若朝廷隨材試用異日攘夷狄立功名未必不由此塗出也非陛下神聖英武不能決行此策臣雖非職事而受恩至深有所見聞不敢瘖默謹錄奏

聞伏候敕旨

代呂大防乞錄用呂誨子孫劄子

元祐元年

臣竊見故御史中丞呂誨忠於先朝極陳讜論致忤時宰繼死外藩臣等皆嘗與之同官備聞論議一切出於至誠而有不撓不回之節雖處散地未嘗一日有忘朝廷之意憂傷憤疾以致殞沒臨終之日召司馬光面託後事無一言及其家私惟云朝廷事猶可救願公更且竭力歷觀前後諫臣忠勤忘身少見其比今其家甚貧諸子仕於常調欲望聖慈特賜矜憫優加贈典錄用諸子之才者以



旌名臣之後取進止

奉聖旨曰由庚除太常寺太祝

### 代宋選奏乞封太白山神狀

伏見當府郿縣太白山雄鎮一方載在典祀案唐天寶八年詔封山神爲神應公迨至皇朝始改封侯而加以濟民之號自去歲九月不雨徂冬及春農民拱手以待饑饉粒食將絕盜賊且興臣採之道塗得於父老咸謂此山舊有湫水試加禱請必獲響應尋令擇日齋戒差官立取臣與百姓數千人待於郊外風色慘變從東南來隆隆獵獵若有驅導既至之日陰威凜然油雲蔚興始如車蓋既

日不散遂彌四方化爲大雨罔不周飮破驕陽於  
鼎盛起二麥於垂枯鬼神雖幽報答甚著臣竊以  
爲功效至大封爵未充使其昔公而今侯是爲自  
我而左降揆以人意殊爲不安且此山崇高足亞  
五岳若賜公爵尚虛王稱校其有功實未爲過伏  
乞朝廷更下所司詳酌可否特賜指揮



東坡全集卷之三十七  
東坡先生全集卷之三十七

予障我更丁泚后若酒可否於顯前軒

正岳昔顯公賴尚盪王蘇林其育在實未為顯於  
殊而玄剝辨以人意極為不安且此山崇高風亞  
為在效至大桂籬未成對其昔公而今對是為自  
與迥咳一麥效垂林風輒輻幽僻答其昔曰蘇以  
曰不情遂爾四寸以為大雨罔不周禮如無





東坡先生全集卷之三十八

制勅

給事中兼侍講傅堯俞可吏部侍郎

勅士以德望進則風俗厚而朝廷尊以經術用則  
議論正而名器重此君子所以難合而朕亦難其  
人焉具官傅堯俞篤學博行久聞於世歷事四世  
挺然一節懷道不試十年于茲朕欲聞仁人之言  
置之講席非堯舜之道蓋未嘗言給事黃門未究  
其用往貳太宰益修厥官董正治典以稱先帝復  
古之意可



東坡全集卷之三十一  
太常少卿趙瞻可戶部侍郎

勅理財正辭禁民爲非曰義先王之論理財也必繼之以正辭名正而言順則財可得而理民可得而正自頃功利之臣言政而不及化言利而不及義中外紛然朕益厭之具官趙瞻明於吏事輔以儒術忠義之節白首不衰爰自秩宗擢貳邦計將使四方之人知予以耆老舊德居此官者蓋有盍徹之意焉可

王克臣可工部侍郎依前龍圖閣直學士

勅朕承先帝之丕業居其宮室而服其器用常懼不稱而何敢有加焉惟是軍國之備凡仰于百工者乃以諉于冬官有事于斯當識朕意具官王克臣奮自儒術蔚爲聞人歷帥諸藩嘗佐事典才有餘裕所在見稱比由宛丘入奉朝謁而司空長貳艱於其人爰命爾以舊官仍兼內閣之重勉率厥職外以成爾繕治之勞內以全予恭儉之志可

祥符知縣李之紀可廣西提刑

具官李之紀近自畿甸遠至海隅朕視其地如戶庭視其民如一家爾賦政赤縣而廉平之稱達于朕聽是用命爾按刑嶺表其一乃心毋或鄙夷其



民如在朕側往惟欽哉

知楚州田待問可淮南轉運判官

勅具官田待問朝廷取材必始於治民異時吏或不更郡縣而任刺舉剛柔失中民以告病以爾端靜敏恪悃幅無華試于劇郡吏民宜之其卽本道以究爾才往悉乃心毋使厥聲減於治郡可

兩浙轉運副使孫昌齡可秘閣校理知福州

勅具官孫昌齡爾奉使吳越而廉平之稱達于朕聽七閩之會其民智巧易以理服難以力勝今命爾爲守惟寬而明民乃宜之朕方復文館之職以

廣育才之路遂以命爾往惟欽哉可

知徐州馬默可司農少卿

勅具官馬默爾以博學強記宏毅有守剛而不犯明而不苛歷試中外藹然有聞朕方選擇循吏入爲卿佐凡爾所能已試於外者其以告我而力行之往佐大農母忽朕命

兩浙轉運副使許懋可令再任

勅具官許懋吳越之人凋敝久矣朕方蠲理煩碎以安養其衆非得循吏察視郡縣均通有無則民何賴焉以爾儒術精通吏事詳敏歷年于茲民便



東坡全集卷之三十一  
其政既信之俗必易爲功庶無新故更代之勞而有上下相安之美勉修前業無怠日新可

新淮南轉運判官蔡朦可兩浙運判

勅具官蔡朦吳越之人凋敝久矣朕方蠲理煩碎以安養其衆非得循吏察視郡縣均通有無則民何賴焉以爾名臣之子進以儒術歷佐漕府治辦有成東南富庶比於西蜀而機巧過之惟寬且靜則民不媮可

司農少卿范子淵可知兗州

勅具官范子淵朕於士大夫未嘗求備也將歷試以事而收其所長有司言汝治河無狀耗國勞民積歲而功不成朕惟水土之政與郡縣異其觀汝于牧民尚勉求效以益往愆可

故樞密副使包拯男太常寺太祝纘之妻壽

安縣君崔氏可特封永嘉郡君仍封表門閭勅崔氏汝甲族之遺孤大臣之家婦夫亡子天憫然無歸而能誓死不嫁撫養孤弱使我嘉祐名臣之後有立於世惟汝之功昔衛世子蚤死共姜自誓詩人歌之韓愈幼孤養於嫂鄭愈喪之暮若崔氏者可謂兼之矣其改賜湯沐表異其所居以風



東坡全集卷之三十一  
曉郡國使薄於孝悌者有所愧焉可

皇叔某贈婺州觀察使追封東陽侯皇兄某  
贈蔡州觀察使追封汝南侯

勅生分竹符所以廣恩於宗室沒享菲社所以寵  
綏其子孫眷予盤石之宗夙被麟趾之化國有常  
典我其敢忘某等生于高明克自抑畏恭儉寡過  
綽有士人之風忠孝著聞蓋服祖宗之訓屬既尊  
于中外禮當極於哀榮命以廉車卽封其地爰疏  
五等之貴以慰九原之思庶其有知服我休命

士齋可西頭供奉官

勅具官士齋汝宗室子生于安逸而能誦習文法  
以求自試蓋亦有志於士者朕何愛一官不以成  
其志乎可

童湜可特敘內殿崇班

勅具官童湜汝奉法不謹坐廢歷年而能祗畏以  
蓋前失旣更大青稍復汝舊往服厥官益敬無怠  
可

謝卿材可直秘閣福建轉運使

勅具官謝卿材先王設官制祿非特以勸功興事  
也將以觀士之所守而進退之惟愛身者爲能愛



東坡全集卷之三十一  
民惟知義者爲能知利以爾臨事有守信道不圖  
治郡有方奉使不擾力行古人之事庶幾循吏之  
風釋此大邦付之一路仍進直於書府俾增重於  
使權無輕遠人謹視貪吏政成民悅朕不汝忘可  
趙偁可淮南轉運副使

勅具官趙偁汝昔爲文登守而海隅之民至今稱  
之推文登之政達之齊魯刑平賦簡所部以安今  
淮南之人困於征役而重以飢饉汝往按視如京  
東之政以寬吾憂可

呂溫卿知饒州李元輔知絳州

勅呂溫卿等監司郡縣其職不同其爲養民一也  
夫安靜之吏悃悃無華日計不足歲計有餘今自  
部使者移治一郡其深念之服于朕訓以永終譽  
可

王誨知河中府

勅具官王誨汝以名臣子老於治郡所至安靜吏  
民宜之河東吾股肱郡方唐之盛世有賢守風流  
未遠圖像具存勉思古人以紹前列可

邵剛通判泗州

勅具官邵剛詩云淑問如臯陶在泮獻囚獄訟之



東坡全集卷之三十一  
事固儒者之所學也汝官于上庠既習其說矣其往試之可

荆王楊王所乞推恩八人

具官某等或以方伎世其學或以歲月積其勞給事王宮既勤且久增秩改授以旌其能往服休恩益敬無怠可

西頭供奉官張禧得三級轉三官

勅具官張禧疆場之政以首虜計功所從來尚矣爾既應格則賞隨之可

鮮于侁可太常少卿

勅具官鮮于侁奉常之職非特以治郊廟之度服器之數而已國有大政事大議論必稽焉昔魯秉周禮齊不敢謀而晏子太師折衝於樽俎之間國之典常君臣之名分上下守之有死不易則國安而民服朕選建卿士付之禮樂意在於此非我老成之人學足以通古才足以御今智足以應變強足以守官深於經術達於人情其孰宜之詩不云乎彼已之子邦之司直往修厥官無斁朕命可

范祖禹可著作郎

勅具官范祖禹左右起居東觀著作皆史事也今



左右史獨書已行之政有司之常事至於廊廟大議君臣相與之際所以興壞治忽之由一歸於東觀則著作之任顧不重歟非得直亮多聞古之所謂益友者奮筆於其間則善惡質亂後世無所考信汝旣任其事矣益進而專之朕苟有過猶當直書而況其餘乎往祗厥官無曠乃職可

孫覺可給事中

勅朕聞明主在上凡侍從皆得言若其不明雖臺諫亦失職朕以冲渺丕承祖宗未堪多難之憂常恐不聞其過下至執藝猶當盡規豈必諫臣而後

論事矧茲封駁之重任參黃散之間知無不言職固當爾具官孫覺行不違道言不違仁處以孝聞出以忠顯先帝所以遺朕天下謂之正人屢告嘉猷固非小補間自西省遷之東臺而覺方進陽城之直詞固懷蕭生之雅意重違其請閱月于茲卒採羣言以遂前命以爾抗章伏閣之志施於還詔批勅之間其一乃心以稱朕意

皇伯祖克愉可贈忠正軍節度使開府儀同三司

勅國家蒙累聖之餘澤眷宗室之多賢雖設官以



董其私置傳以導其學而重以吏事責之懿親青  
衿而服簪纓白首以奉朝請雖有間平之盛德歆  
向之異材皆湮沒而無傳故嘆息之何及尚賴本  
支之茂蔚爲邦國之華不幸云亡惻然永悼具官  
克愉忠厚以爲質禮敬以自文持滿矜高蓋得諸  
侯之孝履信思順合於大有之賢小心自將沒齒  
無過方朕不言之際遽茲永逝之悲日月有時寃  
寃告具賁以旌旄之寵仍兼將相之榮豈獨慰九  
泉之思亦將勸庶邦之義可

蕃官兀渥常等十二人覃恩轉官

勅具官某等錯居吾圉世濟其忠矧茲臨御之初  
豈有中外之異各從遷秩以廣異恩祇服寵靈益  
堅守禦可

高密郡王宗晟建安郡王宗綽所生母孫氏  
封國太夫人

勅母以子貴春秋之義也朕方因親以教愛廣愛  
以及民封節婦之閭以勸能賢賜高年之爵以助  
養老而況屬籍至近賢王篤生欲大慰於慈心宜  
特推於異數孫氏四德純備五福荐臻豈惟擢秀  
於閨門固已流芳於宮闈舉觴坐上有伯仁仲智



東坡全集卷之三十一  
九  
之賢持節洛濱皆汝南琅琊之貴爰改封於樂土  
俾正位於小君服我休恩介爾眉壽可

客省副使劉瑄知恩州

勅軍國異容兵民異道治戎振旅以鷲勇爲上承  
流宣化以忠孝爲先爾久練武經本由才選屢更  
煩使克有成勞試于一州祇服朕訓可

皇叔叔曹贈洛州防禦使封廣平侯

勅官至持節爵爲通侯非我勲勞之臣則必親賢  
之屬豈云虛受維以飾終具官叔叔曹生於高明力  
自修飭克有常德以沒元身乃眷衡漳夙爲重地

爰假一麾之寵就分五等之封庶其有知服我休  
命可

左侍禁李司可供奉官

勅蠢爾裔夷憑嶮竊發不時討擊何以懲艾爾能  
奮命破走犬羊何愛一官以勸吏士可

張汝賢可直龍圖閣發運副使

勅具官張汝賢朝廷於南方復置都漕者所以均  
節諸路之有無使歲課時入而已非以求贏也至  
俗吏爲之則多收羨財以幸恩寵而民受其病以  
爾昔爲御史號稱敢言奉使江表罪人斯得庶幾



東坡全集卷之三十一  
知義利之分者是以命爾寵之新職往惟欽哉

狄諮劉定各降一官

勅具官某等奉使一路以卹民奉法爲先今乃不然煩酷之聲溢于朕聽公肆其下曲法受賕收聚毫末與農圃爭利使民無所致其忿至欲賊殺官吏朕以更赦置之閑局而公議未厭其削一官往思厥愆服我寬政可

范子淵知峽州

勅具官范子淵汝以有限之財興必不可成之役驅無辜之民置之必死之地橫費之財猶可以力補而旣死之民不可以復生此議者所以不汝置而朕亦不得以赦原也夷陵雖小尚有民社朕有愧於民而於汝則厚矣可

宣德郎劉錫永父元年一百四歲可承事郎

勅劉元年尚齒教民三代之義咨爾百年之故老乃吾六世之遺民自非吉人莫享上壽張蒼仕秦柱下而至漢孝景思邈生隋開皇而及唐永淳古有其人乃今親見何愛一命慰其子孫可

叔頗男敢之可三班借職

勅敢之汝父無祿早世緣母之請以獲一官其恩



東坡全集卷之三十一  
所以克家事毋者惟敬毋怠可

鮑耆年京東運判張响京西運判

勅具官某等朕惟百姓之命寄於郡縣而守令之賢不能人知其實獨賴部使者爲朕耳目而已爾長一郡以才良聞進之漕屬以究其用其使上無惰吏下無冤民以稱朕意可

李周可太僕少卿

勅具官李周僕臣正厥后克正見於周書思無邪思馬斯臧形於魯頌朕命此職亦難其人以爾秉心不回臨事有守通練世故灼知民情所以望爾老豈特車工馬政而已哉可

范純禮可吏部郎中

勅具官范純禮嗚呼維乃顯考克明德秉哲以左右我仁宗俾配德於堯舜天亦維相之使世有人以任我樞機將帥之事今汝獨在外計朕惟瑚璉不可以褻用驥騮不可以小試命以天官之屬其少進之益觀其能往欽哉可

余希旦可知濰州

勅具官余希旦爾本以才選坐累失職亦云久矣肆余大眚罔不更新北海名邦民朴而富往務忠



厚以安其生可

王哲可知衛州

勅具官王哲凡我四朝之舊經德秉哲篤老不衰者今幾人哉以爾好學守節名在循吏而久不治民朕甚惜之太行之麓民朴訟簡守以安靜莫如汝宜可

郭祥正覃恩轉承議郎

勅具官郭祥正朕丕承六朝陳錫四國覃及方外浹于有生矧余通籍之臣可無增秩之寵祗服休命永肩一心可

王崇拯可遙郡刺史

勅具官王崇拯刺史漢官秩六百石魏晉以來皆牧守之任今雖以爲勇爵然非親賢勲舊不在此選爾入直禁省出分虎符兵民所宜選寄滋重有司言爾累勞當遷益修厥官以應名實可

潮州澄海第六指揮使謝皋可三班借職

勅謝皋汝自什伍長積勞累遷至一旅極矣今乃以去惡之功獲補武吏惟廉與慎乃克有終可

皇伯仲郃贈使相

勅親親以藩王室賢賢以尊朝廷古之道也況於



東坡全集卷之三十一  
死生之際恩禮之重國有常典我其敢忘皇伯具  
官仲郃生於高明克自祗畏出就外傳聞好禮之  
稱退省其私有爲善之樂云何不淑罹此閔凶慰  
我永懷豈無異數袞衣赤舄寵均三事之臣玉節  
牙璋坐享專征之器豈云虛授維以飾終庶幾有  
知服我休命可

士暇右班殿直

汝宗室子始名而祿得之非艱守之惟艱祗服朕  
訓乃克終譽可

克鞏遙郡防禦使

朕於宗室無所愛也然猶不欲虛授以速人言得  
之惟艱乃罔後悔凡有進秩必付有司攷其歲月  
察其行義則朕與汝皆無愧豈不休哉

劉夔閣門祗候

惟我神考篤于將帥生則厚其寵死則恤其孤將  
使識朝廷之儀習軍旅之事無忝厥祖以世其家  
成汝之志可謂至矣將何以報之可

王安石贈太傅

勅朕式觀古初灼見天意將有非常之大事必生  
希世之異人使其名高一時學貫千載智足以達



其道辯足以行其言瑰瑋之文足以藻飾萬物卓  
絕之行足以風動四方用能於期歲之間靡然變  
天下之俗具官王安石少學孔孟晚師瞿聃罔羅  
六藝之遺文斷以己意糠粃百家之陳迹作新斯  
人屬熙寧之有爲冠羣賢而首用信任之篤古今  
所無方需功業之成遽起山林之興浮雲何有脫  
屣如遺屢爭席於漁樵不亂羣於麋鹿進退之美  
雍容可觀朕方臨御之初哀疚罔極乃眷三朝之  
老邈在大江之南究觀規模想見風采豈謂告終  
之問在予諒闇之中胡不百年爲之一涕於戲死  
生用捨之際孰能違天贈賻哀榮之文豈不在我  
寵以師臣之位蔚爲儒者之光庶幾有知服我休  
命可

楊繪知徐州

勅楊繪士有拙於謀身而巧於治民疎於防患而  
密於慮國其自爲計則過矣而朕何疾焉先帝龍  
興首擢用爾置之臺諫以直諒聞言雖無功效於  
今日簡易輕信失之匪人坐廢十年陶然自得詩  
人所謂豈第君子者繪庶幾焉彭城大邦吾股肱  
郡政成民悅朕不汝忘可



東坡全集卷之三十一  
五  
陳薦贈光祿大夫

勅昔我英祖博求天下之士以輔翼我神考于東宮二十餘年之間山陵既成人物改謝顧瞻在廷一二臣外罔有存者朕惻然傷之永懷其人具官陳薦剛毅木訥器遠任重密勿左右以責難爲愛君周旋藩輔以卹民爲報國淪喪未幾風烈如在雖死者不可復作而追榮之典猶足以寵綏其子孫且使朴忠守道之士知朕意之所予者可

呂穆仲京東提刑唐義問河北西路提刑

勅先帝立法改制所以約束監司守令使不得營私而害民者可謂至矣朕始罷賦泉之令復征徭之法凡先帝之約束當益申而嚴之使出力從政之民無所復病以爾穆仲等或端靜有守敏於爲政或直亮多聞志於仕道而京東河朔皆天下重地也往修厥官稱朕意焉可

沈叔通知海州

勅朕嗣位以來通商惠農施舍已責有不順成荒政畢舉而海濱之民羣聚剽掠此吏不稱職備災無素之過也今選命汝惟往安之非勝之也畏苟有以生矣其肯自棄於惡可



孫向保州通判

勅孫向一郡之寄在汝守貳察姦舉能既復其舊矣則達政之吏可以有爲爾通練民事既試有勞其從所請以觀來效可

鄧闢朝散郎

監邕州  
門金坑

瘴霧之鄉上幣所出累年於此勤亦至矣法當遷秩以荅久勞可

荆王新婦王氏潭國夫人

勅易稱中饋爲家人之正吉詩美羔羊蓋鵲巢之功致婦德有常含章不曜能使君子樂且有儀則

內助之賢從可知矣王氏早服師傅習聞詩禮富貴而能恭儉俯仰極於孝慈令問藹然刑於宗族其改封大國象服是宜以稱我叔父之德爲內命婦之法豈不休哉可

劉庠贈大中大夫

勅國以求賢爲事士以得時爲急士旣難進而易退時亦難得而易失日月逝矣歲不我與古人之歎復見于今具官劉庠才備德博器遠任重逮事三朝出入二紀英祖神考實知其人而剛毅朴忠學不少貶肆朕嗣位疇咨故老如庠等輩不過數



東坡全集卷之三十一  
人方當召用命不少假使九原而可作雖百身其  
何贖式章異數賁于其柩雖知無益以塞餘哀可

李琮知吉州

勅李琮汝以久遠無根之賦使畏威懷賞之吏均  
之于無辜之民民以病告聞之惕然使吏覆視皆  
如所聞既正其事矣而汝猶自言若無罪然朕惟  
更赦不汝深咎遷于一州往深念之廬陵之富甲  
於江外使民安汝朕則汝安可

高士良可文思副使

勅高士良汝閱習民兵技藝超等課以歲月於法

當遷往服寵靈益思來效

皇叔叔遂可贈懷州防禦使追封河內侯

勅生于富貴而無驕逸之患終于祿位而有歸全  
之美始終之義有足賢者具官叔叔遂性於忠孝文  
以禮樂蓋蒙祖宗之澤而服師保之訓克有令聞  
以沒元身是用爵之通侯官以持節上以惇勸於  
宗室下以寵綏其子孫可

楊王子孝騫等二人荆王子孝治等七人並

遠州團練使

勅某等先皇帝篤兄弟之好以恩勝義不許一叔



東坡全集卷之三十一  
出居于外蓋武王待周召之意太皇太后嚴朝廷之禮以義制恩始從其請出就外宅得孔子遠其子之意二聖不同同歸于道可以爲萬世法朕奉侍兩宮按行新第顧瞻懷思潜然出涕昔漢明帝問東平王在家何等爲樂王言爲善最樂帝大其言因送列侯印十九枚諸子年五歲以上悉帶之著之簡策天下不以爲私今王諸子性于忠孝漸于禮義自勝衣以上頎然皆有成人之風朕甚嘉之其各進一官以助其爲善之樂尚勉之哉母忝乃父祖以爲邦家光可

呂公著妻魯氏贈國夫人

勅婦人之德如玉在淵雖不可見必形諸外視其夫有羊羔之直相其子有麟趾之仁則內德之茂從可知矣具官呂公著故妻魯氏名臣之子元老之婦所資者深故志存乎仁所見者大故動協于禮環佩穆然閨門化之而降年不永祿不配德其改封大國正位小君庶幾爲女史之光非獨慰其夫子而已可

仲暹可遙郡防禦使

勅仲暹居貧賤而有聞易處富貴而無過難凡我



東坡全集卷之三十一  
宗室皆有位著雖不任以事無所施其才而刑于厥家有以攷其行日月其邁爵秩當遷朕不爾私服之無愧可

司馬光三代妻

曾祖政太子太保

勅書曰臯陶邁種德種之遠故其發也難發之難故其報也大古之君子有種德於百年之前而待報於數世之後者昔聞其語今見其人某官某故曾祖某官某篤行有聞信於鄉國懷道不試遺其子孫天不吾欺再世而顯至於曾孫其德日躋衮衣纁裳進位于朝退有事于家廟其致朕命詔于有神尚食其報以康乃後可

曾祖母薛氏溫國太夫人

勅朕自通籍之臣皆有以寵綬其父母而自祖以上非予丞弼之家莫獲褒顯君子之孝至於尊祖以及其妣用邦君之禮以隆其家可謂至矣某官某故曾祖母某氏專靜有守柔嘉維則經之以孝慈緯之以恭儉使清白之訓不墜于子孫而隱德之報可質于天地我有異數詔于幽窆藿弗副筭尚服享之可



東坡全集卷之二十一  
祖法太子太傅

勅朕有元臣以德媚于上下民見其羽旄聞其車馬之音則稽首而聚觀之況其父祖墳墓之所在望其草木蓋有流涕而拜者錫命之寵豈特以慰其家而已哉某官某故祖父某官某篤學力行追配前人仕道難進止於一命無疆之慶在其子孫風流未遠英烈如在歆予寵章以慰民望可

祖母皇甫氏温國太夫人

勅夫天人之際若不可知而善惡之報各以其類凡今富貴壽考光顯于世朕察其父母大父母未有不仁而得之者也某官某故祖母某氏令德孝恭著于閨門好禮慈儉刑于姻族始生賢子以大其家而餘澤方茂福祿未究再世之後莫之與京愍冊追榮國有常典庶幾幽壤服我寵靈可

父池贈太師追封温國公

勅朕聞盛德之士必與天合考之古人而無疑質諸鬼神而不慙雖不當世必有達者某官某故父某官某德爲世範言爲士則躬蹈險夷之節庶幾顏閔之行事我仁祖爲時名臣而儒術之用止於侍從德澤之施極於方鎮天厚其世篤生異人不



東坡全集卷之三十一  
求而名自章不言而人自信皆曰君子之子宜爲  
天下之用朕旣采民言俾秉國成而淵源之深推  
本所自命以師臣祚之大國使人知有道之士雖  
及有無疆之休可

母聶氏温國太夫人

勅古之烈婦著在史冊非有憂患不見名節若夫  
令德懿行秀于閨門而湮滅無傳何可勝數獨賴  
子孫之賢或以表見於世君子之欲得位行道豈  
非以顯親揚名之故歟某官某故母聶氏早以淑  
女嬪于德人恭儉信順以相其夫慈和嚴翼以成  
其子使朕得名世之士以濟於艱難其遺風餘澤  
蓋有存者改封大國正位小君非獨以報其德庶  
幾令名與子俱傳於天下可

故妻張氏温國夫人

勅夫婦之好義同賓友懃瘁相成於艱難之中而  
死生契濶於安樂之後朕聞其事惻然傷之具官  
某故妻某氏少以女士不勤姆師歸于德門克有  
令問從我元老辭寵居約遊神清淨之庭守德寂  
寞之宅始終之際無愧古人我有寵章慰其永逝  
其正名於大國以從姑妣

原可



張恕將作監丞

勅朕惟人材之難長育之無素事至而求有不可得是以訪之元臣大老之家推擇其子弟庶幾似之以爾名臣之子篤學好禮敏於從政試之匠事以觀其能爾克遠猷無忝乃父以稱朕意可

趙濟知解州

勅趙濟古者官有常人士有定論雍也可使南面求也可使爲百乘宰論定而官不浮則民服汝長西師歷年於此矣考之清議不曰汝宜尚畀一城以觀來效敬之戒之毋失朕命

李承之知青州

勅朕東望齊魯之國河岱之間沃野千里生齒億萬商農阜通儒俠雜居可以大度長者勝難以細謹法吏治也具官李承之生于甲族世爲名臣屢試有勞所見者大肆予命汝尹茲東土昔曹參爲齊問治於其師蓋公公曰治道貴清淨而民自定汝師其言則予汝嘉可

韓維三代妻

曾祖處均燕國公

勅漢諸袁之父子四世繼出五公唐諸溫之兄弟



東坡全集卷之三十一  
同時並列三省著在國史古無擬倫眷予世臣有  
若韓氏億事仁祖始參大政篤生三子咸秉國成  
豈惟嗣世之賢實賴積善之報具官某曾祖某潛  
德不耀久而自彰天祚厥家世濟其美盛矣曾孫  
之貴蔚爲三壽之朋逮予續嗣之初繼受艱難之  
託允文而靖旣直且溫旋觀純德之全尚識遺風  
之自是用因上公之舊秩開北國之新封仰以增  
廟室之光華俯以慰丞嘗之怵惕可

曾祖母李氏燕國太夫人

勅朕惟公卿之家有能父子躬履一德弼亮三世

非其淵源深長外有羔羊諒直之賢內有鳴鳩均  
一之助亦安能奕世秉義久而不忘者乎具官韓  
維曾祖母李氏育德名家作嬪良士珩璜之節動  
必以禮蘋藻之薦敬而有儀用能使其後昆丞弼  
我國家以無斁於世今其蒞政責任茲始余亦何  
愛大國不以易湯沐之舊可

祖保樞魯國公

勅朕方圖任股肱之臣以光大祖宗之業用廣斯  
志以及爾私人之念祖誰不如我是以推沛恩命  
褒顯前人具官某祖某躬履仁義著迹鄉黨積累



東坡全集卷之三十一  
三十四  
深厚見于子孫或佐我仁祖之盛明或相我神考之休烈遺風未遠故吏尚存逮茲續承繼用耆哲朕既恭默思道垂拱責成與其寵祿厥躬不若尊大其祖上以報貽謀之德下以勵移孝之誠肇新曲阜之封增寵師臣之贈服我休命益大爾家可  
祖母郭氏周氏贈魯國太夫人

勅古者婦人爵因其夫貴以其子雖有過人之才絕俗之行不得所託不表於世今余輔臣父子兄弟先後相望以師長我百辟願推鴻恩光顯先烈維考維妣咸追錫休命肆予寵嘉之具官祖母某

德稱閨闈化及宗黨允蹈家人之正居有鵲巢之福翟衣之盛由于而獲國封之貴及孫而大茲用錫爾周公之封以熾韓氏之胄庶其有知服我新命

### 父億贈冀國公

敕朕聞仁宗在位之久有同成康得士之盛不減武宣如儲藥石以待疾疚如種梓漆以備器用凡今中外文武之選率多慶曆嘉祐之人而況一時之老成與聞當時之大政德業傳於父老儀刑見於子孫名在國史像在原廟朕用慨然想見其人



東坡全集卷之三十一  
具官某故父某少稟異材進由直道出爲循吏入  
爲名卿福祿終身而人不疵富貴奕世而天不厭  
篤生三子翼輔兩朝旌旄交馳榮戟互設朕欲賁  
其家廟而貴已窮於人爵改封大國益著隆名庶  
使昭陵之老臣永爲比土之藩輔可

母蒲氏王氏贈秦國太夫人

勅慎終追遠仁也顯親揚名孝也得志行道澤可  
以及天下而富貴不能及其親天也雖不能及而  
追榮之典可以貫幽明褒大之訓可以表後世禮  
也嗚呼此亦仁之至義之盡矣具官某故母某氏  
族爲士望德爲女師恭儉以相其夫嚴敏以成其  
子使朕獲老成之佐以濟艱難之功宜推異恩以  
報舊德可

故妻張氏同安郡夫人

勅朕登進元臣專以德選退食委蛇省察其私有  
召南之風焉抑抑威儀惟德之隅非內有相貳何  
以及此具官韓維妻張氏生于冠族作配君子言  
有物則行應圖史宜疏湯沐之封以稱山河之象  
祗服明命佑我老臣俾無內顧之憂專任仰成之  
寄可



東坡全集卷之三十一  
故妻蘇氏永嘉郡夫人

勅婦人有德行才智之能而不得施于事有言語  
文章之美而不得聞于人而況仁而不壽賢而不  
祿者乎此詩人所以賦彤管而史氏所以傳列女  
也具官某故妻某氏少以女士秀于閨門來嬪德  
人動以禮法而不得與君子偕老翟芾以朝哀哉  
若人命之不淑其改賜湯沐寵以訓詞庶幾采蘋  
之遺芳不與宿草而共盡可

趙濟落直龍圖閣管勾中岳廟

勅趙濟有司言汝罪惡有狀小人有不忍爲而汝  
之朕惟羞汗措紳重置汝于理其退處散地以  
厲風俗可

王彭知婺州孫昌齡知蘇州岑象求知果州

勅具官某爲吏莫不欲威而明威不可立也惟公  
則威明不可作也惟虛則明郡無大小民無剛柔  
事無繁簡政無難易惟公而虛無適而不治以爾  
用法之久不失仁恕折獄之多滋識情僞孫昌齡  
岑象求  
改云端靜有守惻愍無  
華奉使歷年吏民宜之其悉乃心施于有政不侮  
鰥寡母擾獄市稱朕意焉可

王子韶主客郎中周尹考功郎中



東坡全集卷之三十一  
勅王子韶等事有繁簡才有所宜要之郎官天下之清選也朕有所擇於其人而無所輕重於其間以爾子韶博聞強記老而能學以爾尹果藝而達知無不爲各率其職而用其長朕將觀焉可

蔣之奇天章閣待制知潭州

勅三后在上遺文在下炳若雲漢昭回于天乃眷藏書之府因爲育材之地爰登秀傑以備顧問雖持節出使剖符分憂一掛名於其間遂增重於所莅且使民見侍從之出守知朝廷之念遠也具官蔣之奇少以奇才輔之博學藝於從政敏而有功使之治劇於一方固當坐嘯以終日勿謂湖湘之遠在余庭戶之間務安斯民以稱朕意可

皇伯祖宗勝贈太尉北海郡王

勅夫以三公之位冠諸侯王之爵元勳盛德有不能兼非我父兄親賢之隆加之死生哀榮之極則朕豈以此授非其人哉具官宗勝生于高明克自抑畏忠厚以爲質禮敬以自文貴窮人爵而無驕佚之譏考終天命而有歸全之美始終之際中外所賢日月有時窳窳告具備物典冊以將余哀豈獨慰九原之思蓋將勸庶邦之義可



東坡全集卷之三十一  
劉有方可昭宣使依舊嘉州刺史內侍省內  
侍押班

勅朕爲天下父母推一心以馭百官內外雖異愛  
無差等皆欲其處無過之地受有名之賞則上下  
相安人無間言具官劉有方少知忠恪晚益詳練  
砥礪廉隅有搢紳之風祗畏簡書無戲怠之色歷  
歲滋久積勞當遷考之有司皆曰應法往服新寵  
朕不汝私可

宋滋可右侍禁

勅宋滋疆場之臣所以奮不顧身義不旋踵者以  
朕爲能卹其孤也何愛一官不以慰死者之意且  
以爲吏士之勸乎可

鞠承之可素州通判

勅鞠承之自恢復西鄙秦爲內郡宿兵之衆有損  
于前而遠輸之勞至相倍蓰軍政雖簡民事爲重  
監郡之職專在養民有司擇材曰汝可使往辦乃  
事無忝所知可

文及可衛尉少卿

勅文及汝三公子以才行聞擢置要劇衆以爲宜  
而師臣執謙重違其請周廬宿衛職親而務簡雖



東坡全集卷之三十一  
未足以究觀汝能而退食休沐下車里門澣衣子  
舍豈非搢紳之美談而當世之榮觀乎可

李杲卿可京西轉運副使張公庠可廣東轉  
運副使楚潛可廣西轉運副使吳革可廣東  
轉運判官

勅某官某朕卽位以來發號施令務求厥中而寬  
者喜縱忘先帝之約束急者樂刻襲文吏之故態  
汝以才能治狀達于朕聽其往視之夫治民如牧  
羊然視其後者而鞭之可

童珪父參年一百二歲可承務郎致仕

勅童珪父參古者天子巡守方岳之下問百年者  
就見之而絳縣役老趙武謫其輿尉今汝黃髮鮐  
背以上壽聞其可使與編戶齒其往以忠孝教而  
子孫可

單可度可三班借職出職

勅單可度在官滋久更事亦多而無大過有足嘉  
者往祇寵命益務廉平可

智誠知宜州

勅智誠蠢爾裔夷譬之蜂蟻勝之不武不勝爲患  
惟爾守臣威信兩立勝之以不戰消患於未萌則



東坡全集卷之三十一  
民受其賜予惟汝嘉可

張仲可左班殿直

勅張仲歲之不易盜賊屢作爰設勇爵以勸追胥爾能奮身以除民害必信之賞其可忘乎可

張誠一責受左武衛將軍分司南京

勅張誠一孝治之極天下順之不子之罰民不輕犯而貴近之間尚有誠一朕甚傷之乃者姦言蔽行蠹國殘民之狀論者紛然方議其罪而悖德隱惡達于朕聽攷實其狀至不忍言詩不云乎行有死人尚或瑾之禮曰父沒而不能讀父之書以爲手澤存焉今汝之所爲者何爲至此極也縱朕不問汝亦何顏以處搢紳之列乎可

陳侗知陝州

勅陳侗士臨利害之際而不失故常者鮮矣以爾出入冊府幾二十年安於分義不妄附麗以干進取死喪之威兄弟孔懷願爲一郡以卹幼孤朕甚嘉之夫入爲九卿貳出爲二千石此亦搢紳之高選也汝益勉之可

傅燮知鄭州

勅傅燮鄭廢爲邑復爲右輔經營繕完之勞民旣



東坡全集卷之三十一  
告病而吏亦勤矣以爾樂易之政屢試有聞往往任  
其事寬信以御民強敏以御吏稱朕意焉可

除呂公著特授守司空同平章軍國事加食

邑實封餘如故制

元祐三年  
四月四日

門下仁莫大於求舊智莫良於用衆既得天下之  
大老彼將安歸以至國人皆曰賢夫然後用今朕  
一舉仁智在焉宜告治朝以孚大號金紫光祿大  
夫守尚書右僕射兼中書侍郎上柱國東平郡開  
國公食邑七千一百戶食實封二千三百戶呂公  
著訐謨經遠精識造微非堯舜不談昔聞其語以

社稷爲悅今見其心三年有成百揆時叙維乃烈  
考相於昭陵蓋清淨以寧民亦勞謙而得士凡我  
儀刑之老多其賓客之餘在武丁時雖莫望於前  
烈作召公考固無易於象賢而乃屢貢封章力求  
退避朕重失此三益之友而閔勞以萬幾之煩是  
用遷平土之司釋文昌之任毋廢議論時遊廟堂  
於戲大事雖咨於房喬非如晦莫能果斷重德無  
逾於郭令而裴度亦寄安危罔俾斯人專美唐世  
可特授司空同平章軍國事加食邑七百戶食實  
封三百戶餘如故仍一月三赴經筵二日一入朝



因至都堂議軍國事

除呂大防特授太中大夫守尚書左僕射兼  
門下侍郎加上柱國食邑實封餘如故制

三年四月四日

門下朕聞天子有道其德不可得而名輔相有德  
其才不可得而見故漢之文景紀無可書之事唐  
之房杜傳無可載之勲當時安榮後世稱頌予欲  
清心而省事不求智名與勇功天維顯思將啓承  
平之運民亦勞止願聞休息之期眷予元臣咸有  
一德咨爾百辟明聽朕言中大夫守中書侍郎柱

國汝郡開國公食邑二千二百戶食實封三百戶  
賜紫金魚袋呂大防造道純深受才宏毅果藝以  
達有孔門三子之風直大而方得坤交六二之動  
又踐右闈蔚爲名臣宜升左輔之崇兼綜東臺之  
務加賦進秩寵數益隆得位與時憂責彌重於戲  
若古有訓無競維人崔公建中之風以除吏八百  
而致裴垍元和之政以薦士三十而能惟公乃心  
何進之有可特授太中大夫守尚書左僕射兼門  
下侍郎加上柱國食邑七百戶食實封三百戶餘  
如故



東坡全集卷之三十一  
除范純仁特授太中大夫守尚書右僕射兼  
中書侍郎進封高平郡開國侯加食邑實封

餘如故制

元祐三年  
四月四日

門下朕惟朝廷之盛衰常以輔相爲輕重若根本  
疆固則精神折衝故薦呂臣奉已而不在民則晉  
文無復憂色汲長孺直諫而守死節則淮南爲之  
寢謀朕思得其人付之以政使天下聞風而心服  
則人主無爲而日尊咨爾在廷咸聽朕命中大夫  
同知樞密院事上柱國高平郡開國伯食邑九伯  
戶食實封二百戶賜紫金魚袋范純仁器遠任重

才周識明進如孟子之敬王退若蕭生之憂國朕  
覽觀仁祖之遺迹永懷慶曆之元臣強諫不忘喜  
臧孫之有後戎公是似命召虎以來宣雖兵政之  
與聞疑遠猷之未究坐論西省進貳文昌增秩益  
封兼隆異數於戲時難得而易失民難安而易危  
予欲守在四夷以汝爲偃兵之姚宋予欲藏於百  
姓以汝爲惜民之蕭曹勉思古人以稱朕意可特  
授太中大夫守尚書右僕射兼中書侍郎進封高  
平郡開國公加食邑七百戶實封三百戶餘如故  
除苗授特授武泰軍節度使殿前副都指揮



使勳封食實如故制

元祐三年七月十一日

門下出總元戎作先聲於士氣入爲環尹寓軍政於國容將伸闡外之威以迪師中之吉咨於爾衆朕得其人侍衛親軍步軍副都指揮使威武軍節度觀察留後持節福州諸軍事福州刺史上柱國濟南郡開國公食邑二千八百戶食實封三百戶苗授早以異材見稱武畧被服忠義有烈丈夫之風砥礪廉隅得士君子之槩薦揚邊圉益著勞能拔自衆人旣蒙先帝之遇遂拜大將無復一軍之驚祇扈殿巖肅將齋鉞予欲少長有禮而兵可用

汝其夙夜在公而令必行於戲愛克厥威罔功茲爲深戒師衆以順爲武古有成言惟懋乃衷毋忘朕訓

除皇伯祖宗晟特起復制

元祐三年十一月一日

門下曾閔之哀喪不貳事漢唐之舊禮有奪情矧予藩屏之親實兼臣子之重雖閨門以恩掩義而公侯以國爲家伯臣司宗職不可曠要經服事古有成言非予爾私其聽朕命皇伯祖彰化軍節度州管內觀察處置等使檢校司空開府儀同三司持節涇州諸軍事涇州刺史判大宗正事上柱國



東坡先生全集卷之三十一  
高密郡王食邑七千八百戶食實封二千四百戶  
宗晟天資純茂德履方嚴襲餘慶於祖宗蹈格言  
於師保典司屬籍克有令名郢客卒業於浮丘辟  
疆受知於先帝允釐厥位無愧昔人屬此閔凶纍  
然毀瘠嗟日月之逾邁重職業之久虛宜復寵名  
式從權制於戲出居官次非王事不談退適倚廬  
讀喪祭之禮則忠孝兩得人無間言功名益隆親  
有顯譽勉服朕訓光昭前聞

東坡先生全集卷之三十八



東坡先生全集卷之三十九

制勅

姚居簡押木棧上京酌獎轉三班借職

勅姚居簡不煩民力而辦官事會其所運罕所失  
亡可

賈種民知漢陽軍呂升卿通判海州

勅賈種民等天下有道士知分義流品清濁各有  
攸處如種民升卿亦不汝棄往服寵命益祗厥官  
可

張世矩再任鎮戎軍



勅具官張世矩高平故地夷漢雜處啓以夏政疆  
以戎索惟威與信並行德與法相濟則種落內附  
民安其生以爾習知邊情克有武畧賦政之美歷  
年于茲夫已信之民易治已練之兵易使無改乃  
舊益厥成可

### 劉誼知韶州

勅具官劉誼汝昔爲使者親見民病盡言而不諱  
厄窮而不悔夫豈知有今日之報乎孔子曰巧言  
令色鮮矣仁夫能爲朕牧養遠民惠鮮鰥寡者必  
剛毅回之士也往服厥官益信汝言可

### 呂惠卿責授建寧軍節度副使本州安置不 得簽書公事

勅元兇在位民不奠居司寇失刑士有異論稍正  
滔天之罪永爲垂世之規具官呂惠卿以斗筭之  
才挾穿窬之智諂事宰輔同升廟堂樂禍而貪功  
好兵而喜殺以聚斂爲仁義以法律爲詩書首建  
青苗次行助役均輸之政自同商賈手實之禍下  
及雞豚苟可蠹國以害民率皆攘臂而稱首先皇  
帝求賢若不及從善如轉圜始以帝堯之心姑試  
伯鯨終然孔子之聖不信宰予發其宿姦謫之輔



東坡全集卷之三十九  
郡尚疑改過稍畀重權復陳罔上之言繼有碭山之貶反覆教戒惡心不悛躁輕矯誣德音猶在始與知己共爲欺君喜則摩足以相歡怒則反目以相噬連起大獄發其私書黨與交攻幾半天下姦賊狼籍橫彼江東至其復用之年始倡西戎之際妄出新意變亂舊章力引狂生之謀馴至永洛之禍興言及此流涕何追迨予踐祚之初首發安邊之詔假我號令成汝詐謀不圖渙汗之文止爲欵賊之具迷國不道從古罕聞尚寬兩觀之誅薄示三危之竄國有常典朕不敢私可

許懋秘閣校理知福州

敕許懋七閩之會其民智巧吏得其人則摩然心服不勞而治不得其人則紛然力爭雖勞不服以爾賦政東南民用不擾旣久而信厥聲藹然肆余命爾長茲劇郡夫身在江海之上而職在魏闕之下民之瞻望顧不美歟可

喬執中兩浙運副張安上提刑

勅喬執中等夫以卹刑之道達之於主計則非聚斂之臣以牧民之意推之於卹刑則非文法之吏以爾執中奉使東南吏服其明民懷其惠以爾安



東坡全集卷之二十一  
上賦政毗陵寬而有制嚴而不殘是以命爾各祗  
厥服夫民新脫賦泉之弊以從力役之征其謹視  
貪吏以無害我成法可

宇文昌齡吏部郎祝庶刑部郎

勅昌齡等古以人物掌選而士不濫進以經術斷  
獄而民無怨言何修何飾而至此今吾一之以格  
律而不免於異議何哉昌齡以儒學進有聞於人  
庶以世家用能宿其業勉思古人以稱朕意可

江東提刑侯利建可江東轉運副使福建運  
判孫奕可福建路轉運副使新差權發遣鄭

州傅夔可江東提刑知常州張安上可兩浙

提刑朝請郎劉士彥可福建轉運判官

勅具官某等朕姑罷賦泉之令復徭役之法使民  
出力以事其上不責其所無者幾以富之閔閔焉  
如農夫之望歲也而差發之際吏或緣而為姦農民  
在官貪者動心焉若郡縣御胥吏不嚴而監司察  
郡縣不謹則南畝之民不困於縣官而困於吏其  
與幾何爾以治行達于朕聽或已試之效或近臣  
之薦必能明朕朕意以保民察吏為本謹視其廉  
貪仁暴勤惰明朕朕亦將觀汝所為而



東坡全集卷之三十九  
進退焉可

奉議王續知太康縣

勅王續朕以天下爲一家然畿甸之民號爲根本若近者不悅四方何觀焉爾以才選往服厥事馭吏以明保民以寬無失朕命可

新差通判齊州張琬可衛尉寺丞衛尉丞韓敦立可通判齊州

勅具官某等朕於士大夫苟便其私而無害於公者蓋未嘗不聽矧以養親爲詞而求易地固朕之所樂聞也往服厥職各祗乃事可

兩浙運副喬執中可吏部郎

勅具官喬執中士知愛身則知愛君知馭民則知馭吏故端靜惠和之士施之內外無適不宜朕察汝久矣今自部使者入爲天官屬無易其守以稱朕命可

供備庫使蘇子元可權知新州

勅具官蘇子元嗚呼交趾之變蘇氏之禍十年於此矣朕念之不哀哀忘而愍存不忍以常法待汝畀之一郡以勸事君敬之哉思所以致此者可不敬歟可



東坡全集卷之三十一  
楊伋落待制知黃州崔台符王孝先各降一  
官台符知相州孝先知濮州

勅國家臨御百年哀矜庶獄好生惡殺視民如傷  
六聖一心簡在上帝而市井無賴譖愬公行若廷  
尉治獄不苛秋官議法有守則仁聖在上姦宄自  
消豈有數年之間坐致萬人之禍死者不復誰任  
其辜具官楊伋等 以患失鄙夫之心而竊乘君  
子之器欲與羣小共分告織之功專務巧詆以成  
疑似之罪試加覆視寃狀了然公議不容彈章交  
上聊從附下之罰少謝無辜之民服我寬恩益務

循省

台符改服我下云往莅安陽兼  
修馬政勉思來效毋重往愆可

趙尚摩勘轉朝議大夫

勅趙克國馮奉世名臣也而老於爲將婁師德郭  
元振儒者也而樂於守邊蓋疆場未寧則以外爲  
重而忠義所激不擇地而安具官趙尚少以宏材  
輔之博學虚心大對方觀鼂董之文推轂西陲遂  
膺羊陸之寄恩威並著戎夏乂安論歲月以稍遷  
姑從舊典收功名於不世勉及前人可

趙思明知永靜軍

勅具官趙思明武吏之進以守土扞城爲高選而



戎壘之政以平徭決獄爲餘事汝以財用往分使  
符知高選之未易得而餘事之不可忽則寡過矣  
可

鮮于侁大理卿

勅具官鮮于侁儒者耻爲文吏而廷尉不用仁人  
久矣流弊之末至於誦法而不知義附勢而不知  
法罔羅紛張延及無辜朕益厭之爾德惟一信道  
不回雖古于張何以遠過是以命爾庶幾天下復  
無冤民不然者朕豈以刑獄之事累老成哉可

吳處厚知漢陽軍賈種民知通利軍

勅具官某等漢口黎陽控引江河久廢爲邑吏民  
不悅比詔有司修復故壘因舊而新務適厥中平  
徭均賦使民宜之明致朕意以慰父老可

顧臨直龍圖閣河東轉運使唐義問河北轉  
運副使

勅具官某朕修賦役之法黜聚斂之吏去薄從忠  
務以養民而寬厚之弊或至於媮夫外臺按事以  
不失有罪爲稱職若下有幸免之吏則必有不幸  
之民民困於吏則歸咎吾法朕甚憂之太原之民  
困於邊備使者之任不輕付予以爾儒林之選號



東坡全集卷之三十九  
稱秀傑有能吏之才而不薄有長者之風而不媮其服新職以莅一道勅唐義問云趙魏之地被邊帶河使者之任匪人可乎以爾直諒之節世其家聲豈弟之心不忽民事必能深識朕意以肅吏靖民爲本往任其責以寬吾憂可

張問祕書監

勅具官張問汝策名三朝宣力四方既有聞矣而篤老之年克已復禮稱道不亂朕聞而嘉之起之鄉閭列之朝會問國故事與民疾苦足矣不必勞以事也優游吾東觀以爲士大夫之表可

范子奇將作監

勅具官范子奇夫以百工之事較之一路之民爲輕而自部刺史入居九卿爲重爾久在外服奔走之勞按視之勤亦少休乎今宮室器用皆有常法守之勿失可以寡過若予予工毋廢厥職可

錢長卿比部郎鄧義叔水部郎

勅具官某等昔漢郎官出宰百里今自監郡以上乃與其選任益重矣非獨爲官求人以濟無窮之務亦將爲國儲士以須不次之舉雖會計溝洫有司之一事而馭吏捍災朕將有取焉可



林邵太僕丞何琬鴻臚丞

勅具官某等爾向以才選出按常平之政官省而歸復使治民蓋將因能而任焉九寺之屬近在輦轂才之所宜易以聞達毋曠厥官朕不汝遺可

文保雍將作監丞

勅具官文保雍朕仰成元老如涉得舟待以求濟苟有以燕安之使樂從吾游而忘其老朕無愛焉大匠之屬未足以盡汝才也而從政之餘遂及爾私並事君親豈不休哉

李南公知滄州穆珣知廬州王子韶知壽州

趙揚知潤州

勅具官某等刺史秩六百石以按列郡而治行卓然乃以二千石爲郡守昔以責人者今以自責則物被其惠民無間言爾等皆嘗奉使督察官吏公明之稱達于朕聽董制江淮控臨河海任亦重矣其益勉之無使風采減於平昔可

高公繪公紀並防禦使

勅鄧訓之德蓋活千人叔向之功尚宥十世矧先王却狄之勲而聖母負扈之託子孫賢者休戚同之具官某性於忠孝文以禮樂襲故家仁厚之風



東坡全集卷之三十九  
蹈布衣恭儉之節以爾父士林早緣肺腑逮事厚  
陵没于中年爵不配德故推餘澤以及後昆抱能  
未施當俟可爲之會臨寵而懼庶保無疆之休可

李之純戶部侍郎

勅保國猶保身藥石不如養氣御民猶御馬鞭箠  
不如輕車故興利以富民不如省事而民自富廣  
求以豐國不如節用而國自豐朕嘉與庶工共行  
此志以爾具官李之純屢試以事號稱循良雖爲  
有司不吝出納宜膺躡等之用庶無虛受之譏服  
我訓詞以厭公議可

穆衍金部員外郎

勅具官穆衍士能用其長以自表見者朕未嘗不  
試也要之必觀其始終然後能決其進退在此選  
者可不勉歟貨幣之入所以權輕重通有無而非  
以求富也往服朕訓以永終譽可

孫路陝西運判

勅具官孫路關右之民困役傷財譬之七年之病  
而求三年之艾朕日夜以思庶幾其民勇而知方  
以爾出入秦雍悉其利病往行所知以稱朕意可

蘇頌刑部尚書



東坡全集卷之三十九  
朕聞帝堯之世伯夷以三禮折民西漢之隆仲舒以春秋決獄是知有道之士必以無訟爲功乃者法病於煩官失其守盜賊多有獄市紛然敷求迴哲之人以清流弊之末具官蘇頌溫文而毅直亮不回仲由冉求果藝有從政之美子產叔向愛直得太古之遺遭罹閔凶亦旣祥禫特詔虛位以待老成與其遂曾閔之私哀顧懷墳墓曷若蹈威綽之前軌顯揚君親佇聞嘉猷以對休命可

王公儀夔州路轉運使程高夔州路轉運判官

勅具官某等設法旣復民知息肩矣然在官者皆農末也三峽之民刀耕火耘與鹿豕雜居正賴良使者察其侵冤使政煩而吏貪者此等豈能遠訴乎朕以大臣薦故擢用汝若遠民無告非獨汝咎薦者可不勉哉可

呂由庚太常寺太祝

勅呂由庚 先皇帝有賢執法朕不及見也思其人行其言用其平生所予者猶以爲未足也而錄其子嗚呼亦可以識朕意也夫詩云惟其有之是以似之汝勉之矣朕不汝忘可



杜訢衛尉少卿鍾離景伯少府少監

勅具官某等朕登進耆老崇德以靖民敷求雋良  
養材以待用非更練有素不輕用其人以爾訢久  
服官箴善守家法以爾景伯既敏而藝有聞于時  
皆吾四世之良往服九卿之貳益固爾守將觀厥  
成可

辛押陀羅歸德將軍

勅具官辛押陀羅天日之光下被草木雖在幽遠  
靡不照臨以爾嘗詣闕庭躬陳瓊幣開導種落歲  
致梯航願自比於內臣得均被於霈澤祗服新寵

盡忠可

高子壽三班借職

勅高子壽程力較績國有舊章命以一官勉思自  
效可

李肩可殿中省尚藥奉御直翰林醫官

勅具官李肩醫雖一技蓋通妙物之神法有衆科  
以助好生之德故縻好爵用勸良能無忘三世之  
傳庶保十全之效可

耿政可東頭供奉官致仕

勅具官耿政肇新霈澤覃及庶工雖請老以家居



亦先朝之逮事各從遷秩以寵歸休可

喬執中可朝請郎尚書吏部郎中

勅喬執中漢以郎官出宰百里今以郡守選屬列  
曹任人之隆於古爲重有司言爾資格當遷其卽  
正員以茂遠業可

李之純可集賢殿修撰河北都轉運使

勅乃者役錢貸息之弊民兵馬政之勞萃于北方  
而天不靖民河溢爲災老幼奔走流離道路十年  
於此矣嗚呼其孰爲朕勞來安集使復其舊乎以  
爾具官李之純治辦之能嘗見於用忠厚之質不  
以觀汝政可不勉歟可

呂大臨太學博士

勅具官呂大臨太學禮義之所從出也不擇人以  
爲法而恃法以爲治可乎漢之郭太符融唐之陽  
城韓愈士皆靡然化之其賢於法遠矣朕方詔有  
司疏理學政而近侍之臣言汝可用必能於法禁  
之外使士有所愧而不爲乃稱朕意可

羅適知開封縣程之邵知祥符縣



勅 赤縣之衆甚於劇郡五方豪傑之林百  
賈盜賊之淵蓋自平時號爲難治而況市易始去  
逋負尚繁役法初復農民未信以爾適學行純固  
有卹民之心以爾之邵才力强敏無媮安之意各  
服乃事以觀其能不患不已知求爲可知者可

杜純刑部員外郎

勅杜純用法如權衡權可以輕重移而衡不可以  
毫髮欺故司寇之職必有守道之長貳而輔之以  
守官之僚屬汝昔爲士師秉節不回獨持正義以  
直羣枉往服厥官無易汝守以不忍之心行無心  
之法則予汝嘉可

劉寔知陳留縣

勅具官劉寔縣劇而難治故有司難於用人地近  
而易知故才者樂於自用臨政以簡決獄以明御  
吏以嚴去盜以武能此四者孰不汝知可

皇伯仲曄贈保寧軍節度使東陽郡王

勅祖宗之德天地並隆施及子孫皆享民社勝衣  
有朝請之奉闔棺有茅土之封始終之間哀榮斯  
極具官仲曄寬厚寡過雍容有常生不勤於父師  
沒見思於姻族旣得考終之道可無追遠之恩豹



東坡全集卷之二十九  
尾神旗守臣之威命金璽蓋綬諸侯之寵章服我  
龍光以賁窳窳可

杜紘右司郎中

勅具官杜紘一歷都司卽踐清要非一時名勝不  
在此選爾以文無害而宿其業往服乃事益茂厥  
德以稱朕命可

皇城使裴景知慈州莊宅副使郭逢知階州  
西京左藏庫副使王克詢知順安軍

勅具官某等朕銓擇將吏視其才力彊敏可任以  
事者必試之治民有不能愛民奉法馭吏而戡士

雖智勇有聞朕無取焉爾等皆以考績察廉號稱  
明練薦者交章故在此選往服厥官無失朕命可  
依前件

借職楊晟該差使吳奉雲等各轉一官

勅某等向勅邊臣增葺城堡所以護安民夷各全  
其生爾能相率獻田出力有足嘉者服我爵秩永保  
忠順可

呂大忠發運副使

勅具官呂大忠發運使按治六路所部幾萬里持  
節出使未有若此其重者也以爾更練世故果於



東坡全集卷之三十一  
從政屢試劇部厥聲藹然是以命爾均南北之有  
無權貨幣之輕重使農末俱利公私宜之以稱朕  
意可

蔣之奇集賢殿修撰知廣州

勅具官蔣之奇按治嶺海統制南極聲教所暨聳  
聞風采自唐以來不輕付予朕旣擇其人復寵以  
秘殿之職使民夷縱觀知其輟自禁嚴以見朝廷  
重遠之意其於服從畏信豈不有助也哉可

吳安持知蘇州劉珪知滑州

勅具官某等兩河之浴朴其弊也悍而輕犯法三  
吳之俗巧其弊也流而不知止惟君子爲能去其  
已甚濟其所不及故所居而民安之朕求二郡守  
訪之左右咸曰汝宜往服朕訓因俗而治可依前  
件

謝卿材陝西轉運使

勅具官謝卿材治邊者不計財惟邊之所用治財  
者不卹民惟財之爲富此古今之通患也朕知汝  
才知可倚忠厚可信故以西方之政責成於汝往  
與帥守者謀之惟適厥中以民爲本可

李曼知果州



勅具官李曼蜀之人治蜀知其好惡察其情僞宜若易然又況於寬而明和而毅如汝曼者乎乃者無實之訴朕既察之矣乘傳西歸平賦役省條教以慰父老之望可

黎珣知南雄州

勅黎珣嶺海之遠吏輕爲姦非良守令民無所赴告往祗厥官如在近甸則予汝嘉可

張赴再任乾寧軍

勅具官張赴使者言汝爲政有方民甚宜之當解而留以慰民望可不勉哉可

皇伯仲嬰贈奉國軍節度使追封申國公

勅祖宗之意仁孝爲先孝故專篤於親仁故閔勞以事雖豐功盛烈不見於宗室而令名美實克全於始終死喪之威哀歎何及具官仲嬰少而簡素輔以溫文旣克已以歸仁亦樂善而忘勢信順多助益大有上吉之祥高明令終真旣醉太平之福建元戎之六纛錫上公之九章維以勸忠豈云虛授庶幾幽壤服我寵靈可

林邵開封推官

勅具官林邵天府之劇古稱難治非兼人之資有



東坡全集卷之二十九  
不能濟今自逋負逃亡悉歸之四廂宜若易辦然夫辦之易則責之詳爾材敏素聞而以舉用往助乃長使治衆如治寡以稱所舉可

鄧義叔主客郎中王諤水部郎中

勅具官某等吏惡數易而事有不得已者通商惠農水政爲急而招携柔遠賓客之事亦重矣各祗乃事爲安官樂職之計可依前件

王荀龍知棣州

勅具官王荀龍平原厭次沃野千里桑麻之富衣彼天下宜得老成循吏以輔安良民式遏姦慝訪

之左右咸曰汝宜往悉乃心朕將觀焉可

黃憲章獲賊可承事郎

勅具官黃憲章勞能之賞不計日月爵祿之報必視首功宜從遷秩之勞以勸追胥之勇可

御史中丞劉摯兼侍讀

勅孟子有言君仁莫不仁君義莫不義一正君而天下定矣朕惟臺諫言責之臣雖知無不言常救之於已失而勸講進讀之士蓋朝夕納誨故日化而不知合於孟子正君之義非獨有司之事也具官劉摯以道事君非法不言使朕日聞所不聞天



東坡全集卷之三十九  
下稱焉宜因古今冊書之成文取其興壞治忽之要論言之於無事救之於未失使朕立於無過之地豈非汝爭臣之大願乎可

處士王臨試太學錄

勅具官王臨觀近臣以其所爲主觀遠臣以其所主朕初不汝知也而光論汝可用其試之太學汝勉之矣朕旣因光以知汝亦將考汝所爲而觀光焉可

皇叔克眷贈曹州觀察使追封濟陰侯

勅先王建邦啓土必先宗盟上自魯衛下至應韓宗室之子莫不南面國家自仁率親專於教愛故生無吏責而富以祿沒享隆名而告諸幽忠恕之道可謂備矣具官克眷以茂美之質服信厚之化雖功名才業不見於用而恭儉孝悌刑于厥官命以廉車卽侯其地皆國之舊非朕敢私庶幾有知服我休命可

寇彥卿彥明左班殿直

以兄殿直寇彥古永樂成死事

勅具官寇彥卿士不難以身徇國朕獨何愛一官不以收恤其家乎祇服朕命毋忘死者可

駙馬都尉張敦禮節度觀察留後



東坡全集卷之二十九  
勅軒冕之來德量爲稱外無克詘之容可以觀德  
內若固有之安可以言量具官張敦禮少以經術  
秀於士林雖緣姻戚之選不失儒素之行日奉朝  
請旣抱才而未試坐閱歲月亦久次而當遷進居  
兩使之間增重諸倩之遇益礪士節以爲國華可  
內人張氏可特封典贊

勅張氏朕幼學之初未就外傳命爾執業以待左  
右勤勞有年恭謹寡過進掌儀範以旌徽柔可

故尚宮趙氏可特贈郡君

勅趙氏先朝差擇女士以輔陰教侍御左右罔匪  
淑人矧茲六尚之選必備四教之法奄焉淪喪宜  
極哀榮以爾名族之英掖廷之舊行應圖史言中  
物則彤管有煒旣傳好德之芳象服是宜無愧飾  
終之典庶幾幽壤服我寵章可

馮宗道右騏驎使內侍省內侍押班梁惟簡  
文思副使內侍省內侍押班

勅具官某等爵祿天下之公器也朕不敢以私暱  
之愛而輕用其賞亦不敢以近習之嫌而不錄其  
功以爾等小心忠孝逮事列聖出入中外劬勞百  
爲而宗道以藩邸攀附之勤惟簡以東朝奉事之



久各還所寄加重其任益勵素守以稱異恩可依  
前件

梁從吉遙郡團練使入內內侍省副都知

勅祖宗之化自家刑國故雖左右近習之臣莫不  
好善而知義彬彬然有士君子之風焉具官梁從  
吉莊重有守溫良寡過給事宮省知無不爲服勤  
邊徼克有成績改錫戎團之命進助內宰之政益  
勵素守以稱異恩可

劉有方內侍省右班副都知

勅祖宗之化自家刑國故雖左右近習之臣莫不  
好善而知義彬彬然有士君子之風焉具官劉有  
方溫恭和毅勤強練密進從王事以法令爲師退  
安私室以圖史爲樂進領右璫之貳益親中禁之  
嚴惟忠與敬乃稱朕命可

翟思知泉州周之純知秀州沈季長知南康  
軍

勅具官某等朕惟四海之廣一夫不獲足以害教  
化之成傷陰陽之和故選建守長必以學士大夫  
爲先孔子曰君子學道則愛人小人學道則易使  
也爾等皆以儒術進有聞于時矣其深識朕意往



行所聞欽哉可

馬傳正大理寺主簿

勅具官馬傳正哀敬折獄明啓刑書理官之任也  
主簿雖卑亦有事於其間矣爾以選用其勉服此  
言可

張之諫權知涇州康識權發遣鄜州

勅具官某等邊郡之政兵食爲先郡守之責文武  
兼綜以爾等才力之選卓然有聞治辦之效見于  
已試朕雖招携來遠不求邊功爾當積穀訓兵常  
若寇至祇率厥服往惟欽哉可

梁諝供備庫副使轉出

勅具官梁諝奉事之久累勞當陞求從外遷亦各  
其志進貳諸使往齒外朝益務廉平以荅休寵可

燕若古知渝州

勅具官燕若古汝向以才選奉使東方官省而歸  
因以得郡蓋可謂異恩矣巴峽之嶮邑居褊陋負  
山臨谷以爭尋常獨渝爲大州水土和易商農會  
通賦役爭訟甲於旁近毋以僻遠鄙夷其民欽哉  
可

刪定官孫諤鮑朝賓並宣議郎



勅具官某等廷見改官法之所嚴也歲月之課保  
任之數差若銖黍輒不得遷今於汝獨畧之者豈  
非以制法定令汝與其議故歟祇服朕命以法自  
律無徒知之可

王振大理少卿

勅具官王振任法而不任人則法有不通無以盡  
萬變之情任人而不任法則人各有意無以定一  
成之論朕虚心以聽人法兼用以爾出入中外敏  
於從政詳平奏讞審於用律廷尉之事爾惟副之  
夫法出於禮本於義勉思古人以稱朕命可

李籲宣德郎

勅具官李籲朕有大政令使近臣總領其議民之  
休戚國之治亂成其手可謂重矣爾以儒術進以  
邑政選而爲之官屬亦豈輕哉二三臣者言爾當  
遷其服朕命益祇乃事可

趙思明西上閣門副使

勅具官趙思明國之宗臣義同休戚故文終之後  
配漢並隆而梁公之孫與唐無極國家佐命元老  
獨高韓王銘勲太常侑食清廟爰自近歲歎其中  
微乃眷裔孫尚有遺烈宜因近侍之請進陞上閣



之貳勉蹈祖武副朕懷人追遠之心可

李承祐內殿崇班 內臣轉官

勅具官李承祐奉事滋久累勞當遷遂齒外朝播紳之列益思忠藎母忝恩榮可

蕭士元知隰州趙永寧知永靜軍

勅具官某等文武異用而其道同軍國異容而其情一爾以才選往莅厥服惟少私寡欲則民自靖惟奉法循理則吏自畏祗率朕訓欽哉可

黃光瑞可內殿崇班

勅黃光瑞朕覆養華夷義均臣子愛重爵賞必加有功以爾昔助王師遠獲逋寇歷年滋久宜示異恩服我寵休永思忠藎可

文貽慶可都官員外郎居中可宗正寺主簿

勅具官某等昔江左二老王導謝安唐之元勳汾陽西平皆以積德流慶子孫多賢布列臺省爲邦之光今吾太師氏亦庶幾焉爾等才行之美所資者深聞見之廣不扶自直宜近而遠未稱朕意其歸服乃事同寅協恭以究事君親之義可

皇兄令夬贈博州防禦使博平侯

勅爵齒之貴並隆於朝廷死喪之威莫先於兄弟



東坡全集卷之三十九  
禮有哀卹義兼哀榮故具官令夬端厚有常靖恭  
寡過生不勤於保傅沒見思於族姻宜分竹符就  
賜茅社服予惇敘之寵慰爾永歸之魂可

高士永知文州

勅具官高士永自將爲守非藝而果不在此選治  
兵欲嚴御史欲明撫民欲寬守邊欲信汝勉之矣  
毋廢朕命可

皇太后再從弟高士績高士澍可並左班殿  
直文思副使梁惟簡可皇城副使

勅具官某等朕惟坤元成物之恩雖以天下養無  
足稱其德者故推餘澤以及葭葦之親左右奉事  
之臣雖天地之施無所報塞尚勉忠孝以荅萬一  
可

范百祿刑部侍郎

勅朕哀敬五刑期協中道論者志於殺惟殺之務  
則深而失情讞者志於生惟生之知則玩而廢法  
朕欲情法兩得生殺必中非俗吏之所能思古人  
而永歎爰試以事乃得其人具官范百祿少以異  
材輔之篤學首奉大對有守禮憂國之言旋爲爭  
臣有責難愛君之意必能參用經術折中人情民



東坡全集卷之二十一  
自以爲不寃汝當務致此者吾必也使無訟朕亦將庶幾焉可

朱光庭左司諫王覲右司諫

勅具官某等惟善人能受盡言故昔之諫者常有不容之憂然有志之士猶且不顧忠義所激憂患可忘今朕恭已無爲虚心以聽汝等所論蓋無虛日朕亦有拒而不聽聽而不用者乎各服新命盡所欲言言而不從朕則有愧知而不言汝亦負朕可不勉哉可

鮮于侁左諫議大夫梁燾右諫議大夫

勅仲虺言湯之德曰改過不吝孔子論一言而喪邦曰惟予言而莫余違嗚呼天下之治亂安危有不出於此者乎朕夙興夜寐思聞其過厥愆曰朕之愆不啻不敢含怒而況於左右輔弼之臣歟具官鮮于侁邦之老成久試于外金石之節皓首不衰具官梁燾出入館殿蓋二十年守道篤志無所阿附皆吾爭臣之選也朕之於事無必無我可則行之否則更之使天下曉然知朕樂聞其過書之史冊足爲美談若乃進則詭詞退則焚草衰世之事朕無取焉可



王巖叟侍御史

敕具官某爾以御史論事稱職擢居諫垣而能秉心不回忠言屢聞考其所爭之義皆有可行之實予維寵嘉之茲復命爾往貳執法樂於從善朕志亦可見矣易曰大君有命開國承家小人勿用必亂邦也爾謹視中外毋縱詭隨以成我純一之政可

錢勰給事中

勅朝廷之政根本於中書而樞機於門下出入考慎然後布之天下一成而不反後世有述焉雖用

人惟均而至於封駁之任其選尤重具官錢勰文學議論世其先人典章憲度博通前世詞命之富多而愈工風力之優煩而不亂其服新命益修厥官使爲政者難於造令而承流者無所議法則惟汝賢可

明堂執政加恩

韓維

勅朕於訪落之初躬總章之祀追嚴烈考以侑上帝七政軌道四海來格禮樂具舉天人並應非余一二大臣同德比義燹和神民何以致此哉具官



東坡全集卷之二十九  
韓維令德雅望外爲師表忠言嘉謀入告帷幄望  
其容貌足以知朝廷之尊聞其風烈足以立貪懦  
之志艱難之際垂拱仰成宜修舊典之常均被慶  
成之澤同底于道朕有望焉可

張瓌

勅親祠合宮昭事上帝明發不寐惕然有懷永惟  
神考之烈高出百王之表選建羣辟遺我後人濟  
于艱難克有成績具官張瓌碩材不器俊德自明  
衛上之忠悃欵四世應務之敏勤勞百爲迨茲配  
饗之成宜均慈報之福履我明命永肩一心可

李清臣

勅祗奉嚴禋肆行大賚誠通幽顯澤被中外六成  
之樂上格於穹壤四簋之黍下浹於輝庖矧余元  
臣相成釐事神人所保霈澤宜先具官李清臣德  
配先民才高當世早以天人之學發爲經緯之文  
左右先朝克有成績屬余訪落之始共濟艱難之  
中迨茲慶成均被慈告宜疏井邑之賜以示臣工  
之榮永孚于休以稱朕意可

安燾

勅於皇烈考屬余大器夙夜祗懼若涉冰淵乃者



東坡全集卷之二十一  
饗帝合宮風雨時若肆雋象魏謳歌聿歸惟天人  
之應萃于眇躬蓋左右之助實賴將相具官安燾  
奮自儒術爲時名臣夔和兵戎無傷財害民之警  
持守法度有送往事居之忠迨茲慶成均被慈告  
井邑之賜國有舊章與民同休居寵無愧可

范純仁

勅朕出款眞室還祀合宮祇見昊天陟配文考禮  
樂具舉華夷駿奔方恭默無言九甲絜辟公顯相  
之賴率禮弗越肆予汝嘉具官范純仁慶曆名臣  
之家熙寧正諫之士著績西鄙授任中樞謨猷靖  
深兵革消伏領使奉祠之日助成大亨之勤降福  
孔多推恩宜廣矧予宥密之地可無勲邑之加往  
服寵章益敬毋怠可

呂大防

勅朕有事總章升侑神考四輔在位百工在廷驥  
假無言各率其職迨此釐事之畢匪我冲人之能  
思與羣公均受帝祉具官呂大防擢自英祖休有  
直聲被遇裕陵愈彰忠力入總文昌之轄手疏磐  
錯之煩六事所瞻倚以爲重三府之議於焉取平  
宜加勲伐之隆益增井賦之衍服我休命思勉厥



終可

韓忠彥黃履並特轉朝請郎

勅考績之法三代共由雖余左右之信臣猶以歲日而敘進率循其舊示不爾私具官韓忠彥願然異材奮以儒術典朕三禮識古人之大全歷事四朝有宗臣之餘烈

遂無東顧之念

祗服新命

黃履受材宏深秉德純固入踐臺省休有老成之風出更藩垣

益修厥官尚勵有爲之心以需不次之舉可

皇叔祖克愛皇叔仲虢並遙郡團練使

勅朕不以親廢法亦不以義掩恩故宗室之英雖

不任事而歲月之考必付有司以爾具官克愛篤行有常率履如一以爾具官仲虢居寵而戒好德不回既累日以當遷非無名而虛授益務忠敬以保厥家可

王獻可洛苑使

勅具官王獻可傳不云乎詩書義之府禮樂德之則禦侮扞城亦儒者之事也汝以詞學進而以武幹聞肆予虎臣謂汝可用往服新命以成汝志可

陳次升淮南提刑

勅具官陳次升春秋書無麥禾蓋病之也今吾淮



甸之民夏旱秋水望熟於來歲譬如負重涉遠未知所舍朕甚憂之汝自百里長以才能選爲朕耳目其往按視省刑獄均力役督盜賊去姦吏使民忘其災以稱朕意可

杜純大理少卿

勅杜純治獄得其道仁及幽顯澤流子孫苟非其人災及草木身任其禍朕敬而畏之久難其人以爾用法平直守道純固不以進退榮辱抑揚其心故在此選靡不有初終之實難可不勉哉可

郭駿開封府司錄參軍

勅具官郭駿汝昔爲獄官不撓于職事以陷無辜之人坐失厥職秉義不回有足嘉者往隸天府總攝羣掾毋易汝守朕將觀焉可

林希中書舍人

勅文章之變與時盛衰譬如八音可以觀政而況誥命之出學者所師號令以之重輕風俗因而厚薄本朝革五代積衰之氣繼兩漢爾雅之文而大道中微異端所汨欲復祖宗之舊必以訓詞爲先故難其人不以輕授具官林希博學強識篤學力行綽有建安之風流逮聞正始之議論往踐外制



爲朝廷常潤色其精微期配昔人使天下識典刑  
之髣髴務究所學朕將觀焉可

司馬光左僕射追封溫國公

敕執德不回用安社稷爲悅以死勤事坐致股肱  
或虧方予訪落之初遽興殄瘁之感其於卹典豈  
限彝章具官司馬光超軼絕塵應期降命蹈履九  
德湛涵六經逮事仁宗以論思獻納任言責翊我  
英祖以安危治亂鑒古今粵惟先朝廷登近弼方  
事獻可而替否不肯枉尺而直尋紬繹新書優游  
卒歲乃心無不在王室不起何以慰蒼生顧惟眇

躬肇稱愆祀雖未能求諸野而得傳說亦庶幾選  
於衆而舉臯陶激濁揚清方甄明於流品制法成  
治永振惠於黎元而慙遺之悲天不得於一老嫗  
慄之歎人皆輕於百身茲大享於合寢仍不預於  
小斂師垣一品降之九原開國於溫用旌直德納  
棺以禭式勸具僚念涕泗以無從想話言之猶在  
俯惟英爽歆此寵靈可特贈溫國公

張績除宣德郎

敕太學博士張績祖宗設賢良文學之科以網羅  
天下之豪俊間得偉人爾繇是選而沉默恬淡安



於冗散學士鄧溫伯與東西省從官列上奏狀朕  
嘉乃冲靜特俾遷秩益務敦睦將有試焉可特授  
宣德郎依舊太學博士

孫覺除吏部侍郎

敕自國家還政文昌將以致治而天官四銓總覈  
人物澄清流品未見其人除擬之間賢愚同滯以  
爾朝請郎試給事中孫覺文學論議燭知本原諫  
省東臺久從踐歷選掄之慎委寄益隆噫法之窒  
闕者更吏之不虔者逐賊文弗作甄序有倫服我  
訓詞尚有大用可特授依前官試吏部侍郎

曹旦知南平軍

敕供備庫副使曹旦西南瀘夷諸種部族散處藁  
篁谿谷之阻與魚鳥羣卉服而居畚田而食樂生  
惡死情無甚異軍摩邊戍備預不虞靜而緩之彼  
自馴擾往服吾訓以稱人知可特授依前官權知  
南平軍事

呂和卿知台州

敕承議郎尚書金部員外郎呂和卿臨海雖小邦  
而有民社之重朕豈輕之爾以仕優而學誠知戒  
夫牆面之煩製錦之未易乎往欽用勵母忽吾訓



夏均全集卷之三十九  
可依前官差權知台州

陸佃禮部侍郎

勅文昌二卿位次八座各有典司咸用專達天官之選目色實繁以爾朝奉郎試吏部侍郎陸佃方頒以先朝一代大典續修筆削勢難兼綜春官宗伯事雖稀簡目力可周而典章文物動關國體益思明練以稱恩休可特授依前官試禮部侍郎依舊充修實錄院修撰官

龍圖閣直學士朝請大夫知定州蔡延慶朝請大夫試戶部尚書李常金磨勘轉朝議大

夫

三考而議黜陟古今所同積日而敘勤勞貴賤無間矧夫內與六官之長外總連帥之權均大計之盈虛司隣邦之動靜歷年應格稽法當遷有司以言朕何敢後具官李常奮由踈遠深自刻修財賦所存綱目具舉具官蔡延慶名臣之後吏治有餘干城四方安靜不擾咸以侍從之選而應股肱之良雖尺寸以遷未彰於異數而命秩之寵差慰於久勞

朝奉郎孫覽除右司員外郎



奉使北方治河而備邊任亦重矣以爲未足以盡其才也而寘之都司吾之所以責任爾者可見也夫分治六官事無鉅細畢陳於前若網在綱振之則舉弛之則盡廢爾昔旣稱治辦矣勉旣厥心以待來効

朝奉大夫田待問淮南提刑制

楊楚春旱秋水民艱於食漸起爲盜遂使州縣犴獄充滿朕憂之未始一日忘也間起爾於山陽守叅領漕事今又命爾按視刑辟徒以爾習其風俗知吏民所疾苦夫察貪暴謹追擾均有無督盜賊此荒政之急也勉勤其職以稱朕意

朝散郎殿中侍御史林旦淮南運副使制

淮甸之民荐罹饑饉乃者詔發倉廩發吳楚之漕以拯其急猶以乏食流徙達於朕聽朕惟救荒之政行之畧盡惟得良使者因事施宜爲若可賴爾由郎官以才任御史習于揚楚之俗其爲朕往視之均徭薄歛禁暴戢姦無使斯人重被其困



東坡先生全集卷之四十

內制赦文

明堂赦文

元祐元年  
九月六日

門下聖人之德無以加孝帝王之典莫大承天朕  
以眇眇之身竢竢在疚永惟置器之重惕若臨淵  
之深承明繼成思有以迺先王之烈紹志述事未  
足以慰天下之心仰繫母慈總攬政體緝熙百度  
和樂四方賴帝貺臨海寓寧又三垂之兵靡警萬  
邦之年屢豐庶幾太同光嗣成美深惟六聖之制  
必躬三歲之祠惟茲肇禋屬予訪落喪有以權而



東坡全集卷之四十一  
從變祭無以卑而廢尊。顧言總章古重宗祀以教諸侯之孝以得萬國之心。我享維天下武式文王之典大孝嚴父孔子謂周公其人追惟先猷嘗講茲禮包舉儒術咨諏縉紳刺六經放逸之文斥衆言淆亂之蔽嘉與四海靈承一天革顯慶之兼尊隆永徽之專配成於獨斷畀予冲人遵遺教於前著成法於後涓選吉日哀輯上儀奉壘琳宮奠玉路寢神之弔矣燕及皇天誰其配之既右烈考於時夙齋輅之駕被袞冕之章備庶物之微追三牲之養靈游而風馬下孝奏而日月光惕然履霜詎

勝悽愴之意優然出戶如聞歎息之聲秩祜賚我思成侍臣助予惻楚旣迄成於熙事敢專饗於闕休宣布洪恩以暨諸夏云於戲漢庭祀帝著於卽乍之踰年唐室施仁固以御門之吉日蓋禮盛者文縟澤大者流長尚賴文武之英屏翰之雋協恭致治以輔邦家

西京奉安神宗皇帝御容禮畢西京德音赦

文元祐二年十月十四日

門下朕以寡昧仰繼聖神顧瞻山陵未忘弓劔之慕益廣宗廟以奉衣冠之游祇遣輔臣往嚴像設



東坡全集卷之四十一  
敞鳳臺之仙宇粲龜洛之仁祠晬表一臨陪京增  
重山川改色方貢祥而效瓊父老縱觀或太息而  
流涕宜施雷雨之澤以荅神人之休云於戲好  
生育物既推文母之慈崇德措刑終成神考之志  
資爾有衆宜體朕懷

德音赦文

元祐三年六月

門下朕以眇躬獲御大器仰聖后之慈訓荷先烈  
之永圖四載于茲涉道尚淺凜然祇惕若履淵冰  
思所以慰安人心奉若天道常慮一夫之失所以  
傷萬物之太和蠲苛去煩夙夜願治迺自去冬連

月降雪異常今春已來久陰不霽農夫失職商旅  
不通比屋之間凍餒彌甚常寒之罰咎在朕躬惟  
日兢兢以圖消復潔精致禱神眷未孚克已自持  
協氣無應切慮四方獄犴冤滯尚多工役煩興人  
咨胥怨鬱成繆盭之變以干陰陽之和宜均渙恩  
以召善氣云於戲遇災祇戒聿修信順之誠正  
事布和庶獲天人之助咨爾中外咸體朕懷

內制詔敕

集官詳議親祠北郊詔

勅門下國家郊廟時祀祖宗以來命官攝事惟三



歲一親郊則先饗清廟冬至合祭天地于圓丘元豐間有司援周制以合祭不應古義先帝乃詔定親祠北郊之禮未及施行是歲郊不設皇地祇位而宗廟之饗率如舊制朕以寡昧嗣承六聖休德鴻緒今茲禋禮奠幣上帝裸鬯廟室而地祇天神久未親祀矧朕方修郊見天地之始其冬至日南郊宜依熙寧十年故事設皇地祇位以荅並貺之報仍令有司擇日遣官奏告施行厥後躬行方澤之祀則修元豐六年五月之制俟郊祀畢依前降指揮集官詳議親祠北郊事及郊祀之歲廟室與

奏故茲詔示想宜知悉

太皇太后賜門下手詔二首

元祐三年七月八日

勅門下皇帝嗣位于茲四年華夷來同天地並應而皇太妃以恭儉之德鞠育之恩雖典冊以時奉行而情文疑有未稱皇帝以祖考之奉尊無二上而吾惟春秋之義母以子貴其推天下之養以慰人子之心宜下禮部大常寺討尋如於典故有褒崇未盡事件令子細開具聞奏

元祐三年閏十二月十四日

勅門下官冗之患所從來尚矣流弊之極實萃于



今以闕計員至相倍蓰上有久間失職之吏則下有受害無告之民故命大臣考求其本苟非裁損入流之數無以澄清取士之源吾今自以眇身率先天下永惟臨御之始嘗勅有司蔭補私親舊無定良止薄德敢配前人已詔家庭之恩止從母比今當由又損以示必行夫以先帝顧託之深天下責望之重苟有利於社稷吾無愛於髮膚矧此恩私實同毫末忠義之士當識此誠各忘內顧之心共成節約之制今後每遇聖節大禮生辰合得親屬忌澤並四八減一皇太后皇太妃準此

趙州賜大遼賀興龍節大使茶藥詔

勅卿肅將慶幣遠涉川途風埃浩然徒馭勤止宜加寵錫以示眷懷

趙州賜大遼賀興龍節副使茶藥詔元祐元年十月

六日

勅卿將命夙興犯寒遠涉駕言未息軫念殊深特致恩頒以嘉勤瘁

賜皇叔祖建雄軍節度觀察留後同知大宗正事宗景上表辭恩命不允詔元祐元年十月九日

勅宗景省所上表辭免恩命事具悉朕初執珪幣



東坡全集卷之四十一  
祇見上帝嘉與百辟徼福文考大賚四海始于親  
賢皆神之休義不當避國有常與爾無固辭

賜皇叔祖宗景上表辭恩命不許詔元祐元年十月

九日

勅宗景覽所上表辭免恩命事具悉國家有大祭  
祀必均慶賞邦甸侯衛輝炮翟闈無有遠邇畢蒙  
惠澤矧我懿親實維顯相祇率舊典毋須固辭

賜新除檢校太保依前河西軍節度使阿里  
骨加恩制告詔元祐元年十月十五日

勅阿里骨朕涓選靈辰奉承宗祀肆均介福徧暨

多方卿世撫侯封夙虔朝命特加寵渥用獎忠嘉

太皇太后賜故夏國主嗣子乾順詔元祐元年十一月

十月十六日

念爾守邦藐然在疚日月逾邁祖葬有時緬懷孝  
愛之深想極攀號之戚往助襄事式昭異恩

元祐元年十一月十六日

惟我列聖眷爾有邦非徒極其寵榮蓋亦同其憂  
患念爾哀疚惻然顧懷臨遣行人往喻至意且致  
奠賻之禮以爲存沒之光

趙州賜大遼賀正旦副使茶藥詔元祐七年十月十九日



勅卿抗旌出境夙駕在塗眷言跋涉之勞宜適興居之節式頒良劑以輔至和

趙州賜大使茶藥詔元祐元年十月十九日

勅卿遠飭使輶講修隣好蒙犯風霧跋履山川宜頒錫於珍芳庶輔安於寢食

趙州賜大遼國賀太皇太后正旦大使茶藥

詔元祐元年十月十九日

勅卿恭講隣歡遠勤輶馭言念驅馳之久適丁寒沍之辰宜錫珍良式昭眷寵

趙州賜副使茶藥詔元祐元年十月十九日

勅卿遠持使節來慶春朝方此沍寒良勤啓處宜示眷懷之異式頒劑和之良

賜鎮江軍節度使檢校太傅開府儀同三司

上柱國康國公判大名府韓絳上表乞致仕

不許詔二首元祐元年十月二十日

勅韓絳覽所上表陳乞致仕事具悉卿四世元老國之長城端笏垂紳不動聲氣風采所及自然折衝軒冕丘園其實何異矧今艱難之際日有冰淵之虞黃髮在廷未敢言病豈宜獨善遽欲即安尚



分北顧之憂。勿起退歸之念。強食自輔。體我至懷。

二月二十日

勅韓絳省所上表陳乞致仕事。具悉。功成身退。人臣之常。壽考康強。有不得謝。卿出入將相。垂三十年。豈以小郡尚勤。元老徒得君重。臥護一方。使吏民瞻師尹之儀。刑蠻夷識漢相之風。采丘園之請。朕未欲聞其省思。慮時寢食親近。藥餌以副中外之望。

賜金紫光祿大夫守尚書右僕射兼中書侍

郎呂公著生日詔

元祐元年十一月二十七日

勅公著卿將相三世輔翼兩朝。方斯千獻。夢之辰有既。醉太平之福。宜膺慶賚。永錫壽康。今賜卿生日羊酒米麵等具。如別錄。至可領也。

賜新除依前中大夫守中書侍郎呂大防辭

恩命不允詔

元祐元年十一月四日

勅大防卿敦大直方。任重道遠。擢貳西省。蔽自朕心。雖與聞政事。爲日未久。而歷試中外。勤勞百爲。蓋有年矣。德位惟允。人無間言。亟服新命。毋煩朕訓。

賜新除御史中丞傅堯俞辭免恩命不允詔



東坡全集卷之四十一  
元祐元年十一月六日

勅堯俞詩云剛亦不吐柔亦不茹朕以卿有樊仲之風是以擢卿爲中執法才難之歎古今共之豈以小嫌而廢大任與其拘文以自疑不若直已而行義亟服乃事無煩固辭

賜正議大夫同知樞密院事安燾乞退不允

詔元祐元年七月十三日

勅安燾卿才當其位義不辭勞內之樞機之謀外之疆場之議旣當身任其責難以家事爲辭而況並奉君親兩全忠孝進無不得退以何名卿之所

求固非矯激朕之不許亦豈空文亟還厥官無煩再命

賜韓絳上第二表乞致仕不允詔元祐元年十一月十日

勅韓絳朕以眇躬求助諸老皆以艱難之際不辭中外之勞胡爲累章確守歸意豈朕不善西伯之養而無人子思之側乎三復喟然未喻厥指朕意不易卿其少安

賜韓絳上第三表乞致仕不許斷來章詔元祐元年十一月十四日



東坡全集卷之四十一  
勅韓絳君臣之義憂樂同之苟皆懷歸誰任其事  
卿之高識雅度輕軒冕而樂丘園天下所共知也  
獨不念先帝託付之重乎勉徇大義勿復以言

二

勅韓絳功成身退人臣之常禮至於非常之遇則  
必有無窮之報朕待卿於形器之表而卿自處於  
繩墨之內未爲得也朕意不易卿無復辭

賜新除依前光祿大夫刑部尚書蘇頌辭恩

命不允詔

元祐元年十一月十七日

勅蘇頌卿篤於仁心深於經術用心司寇勸人無

刑朕惟孝處之深三年不奪其志又推才難之故

千里以待其來卿而不能誰當能者亟服乃事毋

煩力辭

蘇頌表云自循朽邁敢冒僭除伏望  
還成命聽服常僚所有誥命未敢祇受

賜新除落致仕依前光祿大夫范鎮赴闕詔

元祐元年十一月二十日

勅范鎮夫有德君子以精神折衝譬之麟鳳能服  
猛鷲朕虛懷前席以致諸老非敢必以事諉也苟  
得黃髮之叟皤然在位則朝廷尊嚴奸宄消伏卿  
雖篤老乃心王室母憚數舍之勞以副中外之望

皇帝賜故夏國主嗣子乾順進奉賀正馬駝



回詔

元祐元年十二月二十四日

詔故夏國主嗣子乾順遠奉王正來歸時事惟此克庭之實率皆任土之宜乃眷忠勤良深嘉歎

太皇太后賜故夏國主嗣子乾順進奉賀正

馬馳回詔

元祐元年十二月二十四日

詔故夏國主嗣子乾順述職春朝歸誠宰旅修此效牽之禮致其乘服之良再閱來章式嘉忠節

賜觀文殿大學士知穎昌府韓縝上表辭免

恩命不允詔

元祐元年十二月二十五日

勅韓縝朕躬祀總章始行嚴配推廣帝親之澤單

及中外之臣惟我老成逮受顧命均此介福非朕敢私國之故常毋煩謙避

賜鎮江軍節度使判大名府韓絳上第二表

乞致仕不許詔

元祐元年十二月二十九日

勅韓絳為國無強於得人用人莫先於求舊雖已挂冠而謝事尚俾安車而造朝豈有體力未衰蕃宣所寄亟圖自便遂欲言歸矧卿德望並隆神人所相焉有滿盈之懼夫何倚伏之虞尚體至懷少安厥位

賜觀文殿學士正議大夫知河南府孫固乞



致仕不允詔四首

元祐二年正月一日

勅孫固視國如家忠臣可以忘老視民如子君子可以忘勞卿被遇三朝出入二府德望並隆中外所服故起之詞館付以留齋使士有矜式民有依怙屬任之意豈輕也哉釋位謀安引年求避此疎遠小臣之事非所望於卿也尚體至意勿亟懷歸

二

元祐元年正月一日

勅孫固卿英祖所擢以遺祚考乃眷舊學用之西樞朕卽位二年未見君子每惟圖任舊人之意常有越在外服之歎矧欲辭位而去遂安丘園哉三川重鎮務舉大體簿書期會則有司存優游卒歲可以忘老

三

元祐二年正月二十五日

勅孫固廊廟之舊歷事三朝名德並隆如卿者有幾無故釋位其謂朝廷何卿旣自爲謀亦爲乃后謀之勉遵前詔以慰中外之望

四

元祐二年正月二十五日

勅孫固朕永懷三宗追用其人所以尊禮慰藉其意者自以爲無失矣而卿浩然懷歸若不可復留何哉勉徇大義毋違朕志



東坡全集卷之四十一  
賜新除樞密直學士知定州韓忠彥乞改一

偏州不允詔

元祐二年二月

勅忠彥朕嘗覽閱古之圖觀宗臣之文俯仰今昔有槩於心會中山闕守差擇循良卿庶幾焉勉副朕意何以辭爲

賜樞密直學士守兵部尚書王存乞知陳州不允詔

勅王存卿出入四朝更涉夷嶮金石之節終始惟一六卿之長所以倡九牧而厚風俗也豈以職事煩簡爲輕重哉君子出處朝廷之大事而風雨寒

暑膚理之微疾也姑安厥位以稱朕意

賜尚書左丞李清臣生日詔

元祐二年二月二十四日

勅清臣春之方中月復幾望篤生王國之彥蔚爲廊廟之華神旣聽於靖恭民亦宜於愷悌膺我慶賜永綏壽祺

賜朝散大夫試御史中丞傅堯俞乞外郡不

允詔

元祐二年三月十三日

勅堯俞負中外之望居得言之地朕方虛已樂聞嘉猷乃者水旱連歲民流未止賊盜將熾財力靡敝卿旣欲圖實効以酬恩朕亦將考所言以責實



東坡全集卷之四十一  
偃息藩郡豈所望哉

賜鎮江軍節度使充集禧觀使韓絳茶藥詔

元祐二年三月

勅韓絳春夏之交寒燠相沴起居之節調適爲難  
眷予元臣久勞于外宜加存問且錫珍良勉蹈至  
和以符眷倚

賜保寧軍節度使馮京告勅茶藥詔

元祐二年三月

勅馮京卿以篤老久勤外服留齋之重擁髦而東  
蒙犯氛埃徒御良苦宜省思慮近藥物勉遵時令

以副眷懷

賜鎮江軍節度使充集禧觀使韓絳赴闕詔

二首 元祐二年三月二十七日

勅韓絳卿擢自祖宗輔翼先帝德望之重天下聳  
聞與其置之一方勞以民事不若歸安闕下式瞻  
儀刑請老閒居固非所望嘉猷入告夫豈不能遲  
卿言還及此初夏

元祐二年三月二十七日

勅韓絳爲天下計則賢者常勞爲人臣謀則老者  
當逸今朝廷待卿之意酌處其中奉朝請於琳宮



東坡全集卷之四十一  
所以系民望釋負荷於留籩所以慰雅懷勉及清和亟還朝著

賜尚書刑部侍郎范百祿乞外任不允詔元祐

二年三月二十九日

勅百祿成王命君陳商民在辟予曰辟爾惟勿辟予曰宥爾惟勿宥惟厥中古之有司與天子相可否蓋如此而況公卿之間議有異同而不盡其說哉例在中書與在有司固宜審處歸于至當而辭遽欲以此去位非古之道也其益修厥官以稱意

賜龍圖閣直學士新差知秦州呂公孺乞改

授宮觀小郡差遣不允詔元祐二年四月三日

勅公孺朕顧懷西方思得賢守使邊有備而民無擾以卿耆老練達德宇淵靜秦又舊治吏士服習卧護諸將無以易卿

賜彰化軍節度使開府儀同三司判大宗正

事宗晟上表乞還職事不允詔元祐二年四月十五日

勅宗晟書云孝乎惟孝友于兄弟弟施於有政是亦為政卿以膝下之養為宗人之法古之為政執大於此而欲以親辭職耶其益修厥官以稱吾意



東坡全集卷之四十一  
二宗晟表云所生之母已踰老年宜還職事  
以投閒庶盡色難以終養伏望特降睿旨  
俾從素願

勅宗晟古者庶子之官設而邦國有倫所治雖簡  
而所寄甚重卿為宗室祭酒德度之美刑于中外  
朕方慶瓜瓞之茂而欲觀麟趾之應益勵厥職無  
棄爾成

賜故夏國主嗣子乾順進奉謝恩馬馳回詔  
二首

詔故夏國主嗣子乾順臨吊之重以寵世臣思報  
之深復承來价載閱克庭之實備形述職之心乃

眷忠勤不忘嘉歎

元祐二年四月十七日

詔故夏國主嗣子乾順向遣行人往賻襄事繼陳  
方物來奉謝章惟忠可以附民惟禮可以定國勉  
終誠節以副眷懷

賜新除尚書左丞劉摯辭免恩命不允詔

勅劉摯朕昔聞卿言今任以政已試之效見於事  
功廊廟闕人以次遷用宜其右不宜其左能於昔  
不能於今豈有是哉

賜新除中大夫守尚書右丞王存辭免恩命



不允詔 元祐二年五月二十六日

勅王存朕歷選百辟試之以事醇厚而文剛毅而和更涉變故守德不移無逾卿者夫享天下之利者任天下之患居天下之樂者同天下之憂朕非以是富貴卿也其何以辭

賜集禧觀使鎮江軍節度使開府儀同三司

韓絳乞致仕不允詔二首 元祐二年六月四日

勅韓絳向以宏才臥護北道凡斯民之利病蓋一方之安危朕方虛懷以待元老冀疾病之有間得雍容而造朝時聞嘉言以輔不逮告老之請殊非

朕心

一一 元祐二年六月四日

勅韓絳元老在位邦之榮華徒以精神折衝非以勦力為禮游神道館擁節家庭於卿圖告老之安而國有貪賢之美勉自輔養期於少留

賜新除試吏部侍郎范百祿辭免恩命不允

詔 元祐二年六月十二日

勅百祿夫以天官之貳治夏卿之選簿書繁重條格紛委苟非其人則士之失職而無告者多矣朕難其材不以輕授卿有應務之敏而行之以勤有



守官之亮而濟之以通往行其志何以辭爲

賜新除吏部侍郎傅堯俞辭免恩命乞知陳

州不允詔

元祐二年六月十三日

勅堯俞連蹇三黜栖遲十年士無賢愚爲國太息如珠玉之在泥土麟鳳之在網羅朕所以拔卿於久廢之中用卿於期年之內天下拭目欲觀所爲而乃引微疾以自言指便郡而求去豈獨於卿有報國未遂之歎亦將使朕獲用賢不終之譏勉復舊曹以全大節

賜同知樞密院事范純仁生日詔

元祐二年六月十八日

勅范仁純卿天資文武世濟勲勞載嘉誕日之臨豈獨私門之喜宜膺慶賜以介壽祺

賜新除知樞密院安燾辭免恩命不允詔

元祐

二年六月二十四日

勅安燾人才之難從古所歎圖任以舊爲國之常卿以瓌異之資荷艱難之寄勲勞靡懈望實愈隆雖云超陞不改疇昔徒以任之旣久則責之宜專知無不爲乃所望於卿者卑以自牧亦何補於國哉

賜朝議大夫試戶部尚書李常乞除汭邊一



東坡全集卷之四十一

州不允詔

元祐二年八月二十二日

勅李常在泮獻馘亦儒者之常挺劍疾鬪蓋孔門之事雖然義有輕重理有後先與其自請捍邊已癘疥之疾曷若盡瘁事國幹心膂之憂苟推是心何往非報雖願受長纓而往者卿之本懷然自以尺箠而鞭之吾有餘力尚體此意姑安厥官

賜太師平章軍國重事文彥博宰相呂公著

自今後入朝凡有拜禮宜並特與免拜詔

元祐

二年八月二十五日

勅彥博朕聞几杖以優賢著之典禮耄老無下拜

書於春秋魏太傅鍾繇以足疾乘車就坐自爾三公  
公有疾以為故事而唐司徒馬燧亦以老病自力  
對於廷英詔使母拜今吾耆老大臣四朝之舊德  
隆而望重任大而憂深者惟卿與公著而已  
呂公著詔  
即改云惟彥博與卿而已方資其著龜之告豈責以筋力之禮  
今後入朝凡有拜禮宜並特免卿其專有為之報  
畧無益之儀母或固辭以稱朕意

賜新除兼侍讀依前光祿大夫吏部尚書蘇

頌辭免恩命不允詔

元祐二年八月二十七日

勅蘇頌朕惟左右正人之求甚難其選以為直亮



東坡全集卷之四十一  
多聞之益宜莫如卿方虛懷於至言豈曲從於遜  
避亟服乃事毋煩固辭

賜守司空開府儀同三司致仕韓絳乞受冊

禮畢隨班稱賀免赴詔

元祐二年八月二十七日

勅韓絳卿脫屣軒冕願神丘園不為絕俗之高愈  
篤愛君之意喜聞冊號請覲內廷在臣子之誠心  
卿為盡節顧筋骸之末禮吾所未安

賜宰相呂公著乞罷免相位不允詔

元祐二年八月

二十  
八日

勅公著宰相之責綏靖四方羗人既俘士氣益振

長轡遠馭方資老謀卿不强起孰卒吾事近以二  
老之故削亟拜之禮而彥博執謙不回朕既從其  
請矣卿起就位復何疑哉

賜前兩府并待制已上知州初冬衣襖詔

元祐

二年九  
月七日

勅元發歲將墜戶工告始裘宜頒在筥之珎以示  
維藩之寵服之安燠體我眷懷

賜太師文彥博乞致仕不允詔

元祐二年九月十日

勅彥博卿求退之意著於士民執謙之心信於天  
地勉當委重之託初無懷祿之嫌大義苟安細故



東坡全集卷之四十一  
可畧朕命不再卿其少安

二

勅彥博論道則忘年卿不可以年既高而爲請稱德則鄙力卿不可以力不足而爲辭斷之於中義有不易豈以屢請之故而廢將成之功體君至懷以慰公議

賜龍圖閣直學士尚書工部侍郎蔡延慶乞

知應天府不允詔

元祐二年九月十六日

勅延慶入侍禁近出殿藩服已試之效藹然有聲今若予工宜有餘力夫游刃肯綮尚不辭難退食委蛇豈當告病膚理微疾行當自痊勉安厥官以稱朕意

賜尚書左丞劉摯生日詔

元祐二年九月二十二日

勅劉摯律協應鐘辰集析木實生俊輔休有令名膺我寵章以介眉壽

趙州賜大遼皇帝賀興龍節大使茶藥詔

元祐

二年九月二十七日

勅卿隣歡載講使節甚華永言郵傳之勤適此風霜之候宜加寵賚以示眷存

趙州賜大遼皇帝賀興龍節副使茶藥詔

元祐



二年九月  
二十七日

勅卿載馳遠道良苦祈寒豈無藥物之嘉以輔寢  
興之節宜膺寵錫尚體至懷

賜太師文彥博生日詔 元祐二年九月二十九日

勅彥博陽月載臨剛辰協吉篤生元老弼亮四朝  
允為廊廟之華豈獨閨門之慶往膺寵數永錫壽  
祺

賜資政殿學士太中大夫新知成都府王安  
禮乞知陳穎等一郡不允詔 元祐二年十月一日

勅安禮朕惟西蜀地狹而賦重人憊而吏肆徭役  
新定農民在官馭之無方將不勝弊惟朕左右信  
臣明而不苛寬而有斷必能肅遏慢吏扶養小弱  
卿雖微疾強為朕行時近藥石勉享道路稱朕意  
焉

沿路賜奉安神宗御容禮儀使呂大防銀合  
茶藥詔 元祐二年十月七日

勅大防於赫神考如日在天雖光明無所不臨而  
躔次必有所舍肆予命爾祗奉此行禮既告成勤  
亦良至感慕之外嘉歎不忘

賜資政殿學士太中大夫新差知成都府王



東坡全集卷之四十一  
安禮銀合茶藥詔

元祐二年十月八日

勅安禮朕求治如不及用人惟恐失之矧余良臣擢自神考出入中外厥聲藹然朕豈欲其遠去哉特以全蜀之寄甚難其選知卿篤於忠義當不以遠近爲意也勉事道路慎疾自愛往安吾民以稱朕意

趙州賜大遼賀太皇太后正旦大使

茶藥詔元祐

二年十月十七日

勅卿久勤輶傳遠犯風埃眷言行邁之勞良極軫懷之意往頒珍劑以轉至和

趙州賜大遼賀太皇太后正旦副使

茶藥詔元祐

二年十月十七日

勅卿遠乘使傳來講鄰歡屬此沍寒尚勲行役往加問勞式示眷懷

趙州賜大遼賀皇帝正旦大使茶藥詔

元祐二年

十月十七日

勅卿遠慶春朝爲修隣好永惟使事之重遂忘行役之勞旣極歎嘉宜申問勞

趙州賜大遼賀皇帝正旦副使茶藥詔

元祐二年

十月十七日



東坡全集卷之四十一  
勅徂歲向晚修途苦寒方趨造於會朝未即安於舍館往加恩錫增重使華

賜宰相呂公著生日詔

元祐二年十月十八日

勅公著卿三世將相四朝耆老資我良弼實惟茲辰茂膺維嶽之靈永錫如陵之壽宜頒寵數以示眷懷

賜新除龍圖閣直學士李之純辭恩命不允

詔

元祐二年十月十四日

勅之純祖宗之文章與典謨訓誥並寶於世典領其事非有德君子雖積勞久次不以輕授蜀遠而人懦窮困抑塞至無所訴朕專欲以德安之故內閣之命非獨以寵卿抑將使蜀人知朕用卿蓋以德選也其深識此意勿復固辭

賜太師文彥博乞致仕不允詔二首

元祐二年十一月二十五日

勅彥博卿自去歲以來數苦小疾尚能勉留以輔不逮近者神明所相體力自康視聽不衰步趨加健乃欲求去耶今御戎之策未有定議京東西河朔荐飢公私枵然方與二三臣圖之卿未可以即安也



二月元祐二年十二月二十五日

勅彥博卿歷相三宗名聞四夷位極一品書考四十自載籍以來未之聞也固當以國為家以天下為身以安社稷為悅而不當以居丘園為樂也朕方待卿而為政請老之言所未欲聞

賜外任臣寮進賀太皇太后受冊馬詔勅元祐二年十二月二十六日

勅禮以正各國之舊典載閱充庭之實式將戴后之心朕眷忠勤良深嘉歎

賜外任臣寮進奉賀皇太后皇太妃受冊馬

詔勅元祐二年十二月二十六日

勅典冊告成宮闈之慶事君盡禮因物見誠乃眷忠勤不忘嘉歎

賜保寧軍節度使知大名府馮京進奉賀端

午節馬詔元祐二年十二月二十六日

勅馮京受鉞將壇剖符畿甸效充庭之駿足慶中火之良辰乃眷勤誠不忘嘉歎

賜資政殿學士知鄧州韓維進奉謝恩馬詔

元祐二年十二月二十六日

勅韓維廟堂均逸遠不忘君駟駿在庭儀多於物



東坡全集卷之四十一  
載惟忠盡良極歎咨

賜檢校司空左武衛上將軍郭逵進奉謝恩

馬詔元祐二年十二月二十六日

勅郭逵惟卿耆老漸就退閒不忘戴主之誠遠效充庭之駿載嘉忠盡良極歎咨

賜中大夫守尚書右丞王存生日詔元祐三年正月

四

勅王存卿以宏才與聞大政誕日之慶豈惟閨庭寵錫之隆庶延壽嘏

賜試戶部侍郎趙瞻陳乞便郡不允詔元祐二年

正月十三日

勅趙瞻朕褒顯耆舊取其宿望養育俊乂待其成材庶前後相繼朝不乏人則堂陛自隆國有所恃方今在廷之士孰非華髮之良而卿以康強之年爲遠引之計於義未可蓋難曲從

賜皇伯祖宗晟辭免起復恩命不許詔四首

元祐三年二月十五日

勅宗晟卿哀迫之至言不及文覽之惻然欲從所請而宗子之衆才性各殊位不期驕祿不期侈非卿允蹈忠信力行禮義以身先之蓋未易齊也少



屈爾私以成吾志不亦可乎

二元祐三年二月十五日

勅宗晟卿以強起就位爲未便安而朕以徇私忘公爲未盡美書云孝乎惟孝友于兄弟施於有政是亦爲政夫聖人以孝弟爲從政而卿以從政爲非孝非所聞也勉從朕命勿復固辭

三元祐三年二月十五日

勅宗晟卿致孝罔極守禮不回以魯衛之親而行會閔之事吾深欲成人之美遂卿之私顧以宗臣治親有國先務教以道藝時其冠昏獎察其賢能而訓誡其驕情非吾宗室之老孰當父兄之任其深明吾意往服厥官

四元祐三年二月二十二日

勅宗晟君子之於禮雖先王未之有可以義起而況漢唐之舊故事具存如翟方進房喬之流皆以儒術致身不免於釋哀而謀國近歲夏竦晁宗慤亦以近臣奪喪君子不以爲過今宗正之事止於治親譬猶父兄訓勅子弟豈以衰麻之故而廢閨門之政乎卿其勿疑亟服乃事

賜保寧軍節度使知大名府馮京進奉興龍



節并冬至正旦馬詔元祐三年二月二十五日

勅馮京震夙之祥旅庭稱慶歲時之會因物效誠乃眷元臣實勤典禮多儀克舉屢歎不忘

賜外任臣寮進奉謝恩馬詔勅元祐三年二月二十六日

勅銜恩思報因物致誠效茲乘服之良示有驅馳之志永言忠藎良極歎咨

賜外任臣寮進奉興龍節功德疏詔勅元祐三年二月二十六日

勅誕彌之慶中外所同畢輸衛上之誠來獻後天之祝永言忠藎良極歎嘉

賜新除守司空同平章軍國事呂公著辭免

恩命不允詔元祐三年四月六日

勅公著委重元老朕之本心歸安丘園卿之素志今於二者酌處其中使卿獲居勞逸之間而朕不失仰成之託於義兩得夫復何辭

賜新除太中大夫守尚書左僕射兼門下侍

郎呂大防辭免恩命不允詔元祐三年四月六日

勅大防端揆黃門之任虛之久矣以卿德望兼重才術有餘故授之不疑渙號已行僉言惟允務稱朕命何以辭為



賜新除太中大夫守尚書右僕射兼中書侍

郎范純仁辭免恩命不允詔元祐三年四月六日

勅純仁國之安危寄於宰輔朕豈苟然而輕授也哉試之以事而不移斷之於心而不貳成命已出豈容復回往修厥官以稱朕意

賜觀文殿大學士光祿大夫知永興軍韓縝

三上表乞致仕不許斷來章詔元祐三年四月七日

勅韓縝夫任天下之責者無自營之私蒙國士之知者有非常之報矧卿德望兼重體力猶強方資禦侮之壯猷焉用引年之常禮宜安厥位毋復言

歸

賜觀文殿大學士光祿大夫知永興軍韓縝

三上表陳乞致仕不允斷來章詔元祐三年四月七日

勅韓縝朕體貌諸老儀刑四方假以方面之安畧其筋力之禮如卿屢請固無懷祿之嫌而朕固留宜有忘歸之意今中外無事民物小康固恐安車之榮未逾坐嘯之樂朕命不易卿其少安

賜新除太中大夫守尚書右僕射兼中書侍

郎范純仁再上劄子辭免恩命不允詔元祐三年

四月七日



身城合集卷之四十一  
勅純仁卿奉事先帝義深愛君與政西樞論不阿  
世昔聞汲黯之不奪今見徐公之有常參以衆言  
蔽自朕志右宰之任非卿而誰屢執謙詞殊非所  
望

賜新除依前中大夫守中書侍郎劉摯辭免

恩命不允詔

元祐三年四月七日

勅劉摯朝廷設三省建丞弼雖所治不同至於因  
時立政昭德塞違其實一也卿既任其事矣今以  
次遷無足辭者

賜新除依前中大夫守尚書左丞王存辭免

恩命不允詔

元祐三年四月七日

勅王存卿學足以經邦才足以應務更練愈久開  
益居多以積日而稍遷顧僉言之咸允國之常典  
何以辭爲

賜新除中大夫守尚書右丞胡宗愈辭免恩

命不允詔

元祐三年四月七日

勅宗愈卿昔在諫垣首開正論出入滋久操守不  
回雅望在人旣非一日之積歷試而用亦自羣言  
之公往祗厥官毋替朕命

賜新除依前中散大夫充樞密直學士簽書



東坡全集卷之四十一  
樞密院事趙瞻辭免恩命不允詔

元祐三年四月七日

勅趙瞻朕惟本兵之地司命吾民矧羗戎叛服之無常實邊鄙安危之未決豈以此柄輕授其人以卿望重縉紳學兼文武歷試而用衆言允諧往踐厥官勿違朕命

賜新除門下侍郎孫固辭恩命不允詔

元祐三年

四月八日  
勅孫固朕惟三朝老臣義同休戚先帝舊學存者幾人意其風采之聳聞可使謂之曾重小節德望素著寄任已隆昔冠西樞今貳東省衆以為允

義無足辭

賜新除試御史中丞孫覺辭免恩命不允詔

元祐三年四月八日

勅孫覺卿三居諫省皆以直聞蓋嘗遇事以建言志在行義以達道擢為執法實允僉言以卿直諫多聞而朕開納不諱固無觀望難言之病豈有喪失名節之憂哉載閱來章甚非所望

賜新除右光祿大夫依前知樞密院事安燾

辭恩命不允詔

元祐三年四月八日

勅安燾卿謀國之重歷年于茲紀綱修明中外寧



東坡全集卷之四十一  
輯夫圖任共政所憂者大則久勞遷秩亦理之常  
雖固執於撝謙恐難回於成命往服休寵以彰眷  
懷

賜新除中大夫守尚書右丞胡宗愈辭免恩  
命不允詔元祐三年四月十一日

勅宗愈卿更涉夷險踐馭中外出奉使指而民宜  
之入治天官而吏畏之非獨能言者也書不云乎  
敷奏以言明試以功朕得之矣卿其勿辭

賜新除依前中散大夫充樞密直學士簽書  
樞密院事趙瞻辭免恩命不允詔元祐三年四月十一日

勅趙瞻朕之進人可謂難矣自非耆老久次悃悃  
無華則樞機之任不以輕授卿之自視何愧於斯  
祇服厥官思所以稱而已

賜新除翰林學士朝請大夫知制誥許將赴

闕詔元祐三年四月十一日

勅許將卿敏而好學達於從政出殿方國則修儒  
術以飾吏事入備顧問則酌民言以廣上聽待命  
北門號稱內相雖於卿爲舊物實當今之高選亟  
踐厥職佇聞嘉猷

賜新除司空同平章軍國事呂公著辭免冊



禮許詔

元祐三年四月十三日

勅公著多儀以隆輔弼國之彝典自損以信君父卿之美志再閱誠言之請益彰謙德之光勉徇所陳不忘嘉歎

賜正議大夫知樞密院事安燾辭免遷官恩

命允詔

元祐三年四月十五日

勅安燾卿國之雋輔位冠樞庭以時褒陞豈待功闕而能力辭寵命欲以身率羣臣使廉耻相先名器益重勉從來請以篤此風

賜新除中大夫守尚書右丞胡宗愈辭免恩

命不允詔

元祐三年四月十五日

勅宗愈朕之用卿益聽其言考其行事參之公議而斷自朕心可謂審矣而卿固辭不已朕甚感之夫小人以位爲寵求之而不可得君子以寵爲憂推之而莫能去自古以然卿何疑哉

賜新除司空同平章軍國事呂公著辭免冊

禮允詔

元祐三年四月十五日

勅公著冊祝於廟惟周之典臨朝親拜亦漢之舊事大則禮重禮重則樂備古之道也今卿遜避不居自處以約勉從所乞以成其美



賜許將辭免恩命不允詔

元祐三年四月十八日

勅許將進以經術當告我以安危來自西南固知  
民之利病渴聞讜論少副虛懷而乃退托無能力  
辭舊物既非所望其可曲從

賜河西軍節度使西蕃邈川首領阿里骨進

奉回詔

元祐三年四月二十二日

勅阿骨骨惟爾祖先世篤忠孝本與夏賊日尋干  
戈亦惟恃我朝廷爵秩之隆用能保爾子孫黎民  
之衆肆朕命爾嗣長乃師而承襲以來強酋外擅  
爾弗能禁恣其所爲遂據洮城以犯王畧陰連夏

賊約日盜邊朕愍屬羗之無辜出偏師而問罪元  
惡俘獲餘黨散亡山後底平河南綏服朕惟率酋  
豪而捍疆場乃爾世功叛君父而從仇讐豈其本  
意庶能改過未忍加兵果因物以貢誠願洗心而  
效順爾旣知悔朕復何求已指揮熙河路更不出  
兵及除已招納到部族外住罷招納依舊許般次  
往來買賣及上京進奉爾宜約束種類共保邊陲  
期寵祿於有終知大恩之難再勿使來款復爲虛  
言

賜新除依前朝散大夫守尚書吏部侍郎充



龍圖閣待制傅堯俞辭免恩命不允詔

元祐三年

五月二十三日

勅堯俞夙望所在舊疾既平及茲言還慰我虛佇徒得君重雖暫屈於淮陽雅意本朝寧久安於馮翊復求自便殊戾所期往修厥官務稱朕命

賜守尚書右丞胡宗愈乞除閑慢差遣不允

詔元祐三年五月二十七日

勅宗愈朕開獎言路通來下情雖許風聞猶當核實豈以無根之語輕搖輔政之臣朕方馭衆以寬退人以禮加之美職付以大邦朕既無負於聽言

卿亦何嫌而避位祇服乃事母自爲疑

賜尚書右僕射兼中書侍郎范純仁生日詔

元祐三年六月九日

勅純仁卿河嶽之靈神明所相載更誕日永介壽祺體我眷懷受茲寵錫

賜正議大夫守門下侍郎孫固生日詔

元祐三年

六月十三日

勅孫固卿圖任之舊縉紳所推難老之祥神人攸相載更良日益永壽祺申以寵章式隆眷遇

賜正議大夫知樞密院事安燾生日詔

元祐三年



東坡全集卷之四十一  
六月二  
十三日

勅安燾桑弧告慶降哲輔於茲辰綵服拜嘉冠榮  
名於當代祗朕服命益壽乃親

賜龍圖閣學士河東路經畧使兼知太原府

曾布乞除一閑慢州郡不允詔元祐三年七月二十一日

勅曾布將不久任難以責成謀不素定難以應猝  
卿屢試劇郡所臨有聲而況二年于茲諸將所服  
事既卽敘人誰易卿夫擣虛攻瑕兵家常勢知難  
避整夷狄亦然卿若有以待之彼將望而去矣勉  
卒乃事毋忘朕言

賜河西軍節度使西蕃邈川首領阿里骨進

奉回 詔元祐三年八月三日

勅阿里骨卿屢款塞垣願終臣節爰因真篚益著  
誠心再省忠勤良深嘉歎

賜皇叔改封徐王顥上表辭免冊禮允詔二

首元祐三年八月二十日

勅顥卿大雅不羣自得詩書之富為善最樂不知  
軒冕之榮既殿大邦宜膺盛禮而抑損之志逡巡  
不居雖莫稱朕所以極褒崇之心而將使卿庶幾  
獲謙冲之福勉從其意嘉歎不忘



夏均全集卷之四十一  
二月二十日  
元祐三年八月二十日

勅顯錫山土田以昭令德備物典冊益有常儀而卿深懼滿盈過形抑畏一謙四益當克永年三命滋恭固將有後曲成美志以勸事君

賜知涇州劉昌祚進奉輿龍節銀詔

元祐三年十一月十一日

月六日

勅昌祚卿禦侮邊庭馳神魏闕會嘉辰之獻壽納貢篚以效珍載省忠勤不忘褒歎

賜皇伯祖宗晟辭免起復恩命不允詔二首

元祐三年十一月五日

勅宗晟夫要經服事出於孔門墨衰從政見於魯史永惟徇國忘家之義非有食稻衣錦之嫌若非使卿居之而安則吾豈敢強所不欲勉從前詔往服厥官

元祐三年十一月二日

勅宗晟卿德爵與齒皆天下達尊服屬之隆爲宗室祭酒任獨高於三世報宜異於常人故奪情非以私卿而服事所以徇國義無所愧何以辭爲

賜正議大夫知鄧州蔡確乞量移第碩允詔

元祐三年十一月九日



東坡全集卷之四十一  
勅蔡確以義責備春秋有失教之譏以情內恕詩  
人有將母之念碩之得罪事在有司難以貴近之  
親而廢朝廷之典及觀來請有槩予心重違兄弟  
急難之詞以傷人子奉養之意

賜知渭州劉昌祚進奉謝恩并賜月俸公使

及賀端午節馬詔

元祐三年十二月二十四日

勅昌祚卿執德宏毅秉心恪恭拜新渥於公朝謹  
舊儀於令節抗章來上因物見誠再省忠勤良深  
嘉歎

賜端明殿學士銀青光祿大夫致仕范鎮

諭詔

元祐三年閏十二月一日

勅范鎮朕惟春秋之後禮樂先亡秦漢以來韶武  
僅在散樂工於河海之上往而不還聘先生於齊  
魯之間有莫能致魏晉以下曹鄴無譏豈徒鄭衛  
之音已雜華夏之器間有作者猶有典刑然銖黍  
之一差或宮商之易位惟我四朝之老獨知五降  
之非審聲知音以律生尺覽詩書之來上閱龔虞  
之法工師有司考其聲上追先帝移風易俗之心下  
慰老臣愛君憂國之志究觀所作嘉歎不忘



賜朝散大夫守尚書吏部侍郎充龍圖閣待

制傅堯俞乞外郡不允詔元祐三年閏十二月十四日

勅堯俞卿望重本朝進由公議方卿大夫有為之

際亦士君子難得之時而卿出領郡章入佐治典

席未暖而輒去政何時而報成小疾行瘳姑安厥

位

賜保寧軍節度使知大名府馮京進奉賀興

龍節馬一十匹并冬節馬二匹詔元祐三年閏十二月

十八日

勅馮京卿坐鎮全魏隱若長城遠馳頌禱之心來

予馬馬之貢眷言忠蓋良極歎嘉

賜泰寧軍節度觀察留後知相州李珣進奉

賀冬馬一匹詔元祐三年閏十二月十八日

勅李珣卿宣化近邦馳神北闕屬茲陽月之吉遠

效王閑之良言念忠勤不忘嘉歎

賜中大夫守尚書左丞王存生日詔元祐四年正月

四日

勅王存在易之泰與物皆春於時良臣生我王國

宜膺寵賚以介壽祺

賜龍圖閣直學士正議大夫權知開封府呂



公著上表陳乞致仕不允詔二首

元祐四年正月五日

勅公著朕鷄鳴而起志於求助鮐背之老未敢卽安矧卿體力不衰髮齒猶壯遽有引年之請殊乖圖篤之心宜安厥官以稱朕意

二

勅呂公著卿將相三世凜乎正始之風出入四朝蔚然難老之狀浩穰之治談笑而成方觀報政之能遽有歸休之請公議未可卿其少安

賜濟陽郡王曹佾在朝假將百日特與寬假

將理詔

元祐四年正月十二日

勅曹佾卿賢戚莫二德齒並隆眷言朝請之勤思見儀刑之老謝病旣久軫念良深推予賜告之恩期於勿藥之喜

賜光祿大夫守吏部尚書兼侍讀蘇頌上表

乞致仕不允詔二首

元祐四年正月十三日

勅蘇頌吾聞有志之士以身殉道而遺名有道之君使人樂用而忘老今卿不安其位豈吾有愧於古哉夫難進之士年僅及而輒退則已試之才吾莫得而盡用矣激揚多士方資崔毛之德講誦舊聞未卒褚馬之業事非小補卿其少安



二

勅蘇頌卿歷事四朝允有一德徒論徐公之奢儉莫見子文之愠喜朕既寤寐哲士體貌元臣方貴德齒之達尊豈求筋力之常禮矧卿方膺難老之錫宜勵益壯之心惜日有為古人所重引年求去公議未安勉為朕留以慰人望

賜光祿大夫守吏部尚書兼侍讀蘇頌上第

二表陳乞致仕不允詔元祐四年二月二日

勅蘇頌夫天以多士寧王國而祖宗以成德遺後人方使壽考康彊以究其用而朕乃以引年而聽

其去可乎矧卿銓綜之精談笑而辨勉思職事以稱朕心

二

勅蘇頌天官之任老成所宜坐執銓衡有山公晚年之故事簿書煩雜獨蕭俛一時之偏詞卿其總攬網條濶畧苛細委蛇退食以慰士心

新除權禮部尚書梁燾辭免恩命不允詔元祐

四年二月三日

勅梁燾卿出處以義進退以禮昔請補外朕不得已而聽其去今茲選用衆以為宜而恨其晚而卿



又固辭豈朕所望成命不易其速造朝

賜宣徽南院使克太一宮使馮京乞依職任

官例祇赴六參不允詔

元祐四年六月十四日

勅馮京朕以卿耆老厚德重煩以庶事而卿篤恭盡禮自同於有司既朝朔望尚復勤請雖抑抑自警知卿有衛武之風而僕僕亟拜非朕待子思之意宜遵前命以副眷懷

賜右正議大夫守尚書左僕射呂大防生日

詔

元祐四年六月十五日

勅大防股肱之良與國爲重家庭之慶亦朕所同

適斯干獻夢之辰均旣醉太平之福膺予寵錫介爾壽祺

賜翰林學士中大夫兼侍讀趙彥若辭免國

史修撰不允詔

元祐四年六月二十三日

勅彥若卿學世其家宜居載筆之地官宿其業已奏殺青之書自託不能殊非所望祇膺成命毋復固辭

賜河東節度使太師開府儀同三司太原尹

致仕文彥博溫溪心馬詔

元祐四年七月二日

勅彥博惟我宗臣名震夷落狼心駃舌知獻厥誠



朕以張奐拒羗之獻不如旅熬昭德之致已勅邊吏荅賜所直其馬今以賜卿至可領也

賜夏國主進奉賀坤成節回詔

元祐四年七月二十二日

勅節紀誕彌慶均臨照眷守邦之雖遠亦執贄以同嘉嘉與朝臣咸稱壽筆載惟忠恪宜有寵頒

賜皇伯祖宗晟辭免恩命起復允終喪制詔

二首

勅宗晟朕寤寐雋賢燹和中外眷言釋位之久實有乏才之憂而三年未終五詔不起與其貪明哲之美以緝熙庶工不若執孝弟之純以風勵宗室

俛從誠守良極歎咨

二

勅宗晟夫衰麻之哀達於上下損益之變權以重輕雖事君均於事親而奪志難於奪帥俛聽終喪之守以成致孝之全言念篤誠實增屢歎

賜新授樞密直學士趙尚進奉謝恩馬詔

勅趙尚論德進律天下之公議因物見誠臣子之雅志爰陳駟駿以效驅馳體乃至懷極於嘉歎

賜新除龍圖閣學士依前中散大夫陳安石辭免恩命不允詔



東坡全集卷之四十一  
四三  
勅安石夫士出身從仕少壯陳力耆老守節朕必  
有以寵綏之卿逮事四朝別歷中外號稱良能不  
見過失書閣之拜衆以爲宜無復固辭以遂成命





東坡先生全集卷之四十一

內制勅書

賜南平王李乾德曆日勅書

元祐元年十月八日

勅乾德眷彼海隅被予聲教宜有王正之賜以爲農事之祥勤郵遠民以開嗣歲

賜新除依前交趾郡王李乾德加恩制告勅

書

元祐元年十月十五日

勅乾德朕躬執珪幣大饗帝親盼布湛恩徧暨諸夏卿世綏侯服欽順朝廷宜錫徽章以昭異數

賜外任臣寮曆日詔勅書

元祐元年十月二十八日



勅韓絳朕申命日官逆推嗣歲眷予共理頒此成書勉劭農功毋違時令

賜侍衛親軍馬軍都虞候劉昌祚進奉賀明

堂禮畢馬勅書元祐元年十一月二十日

勅劉昌祚大事告成多方同慶汝以分符之重特修效馬之儀載念勤誠不忘嘉歎

賜外任臣寮進奉興龍節馬詔勅書元祐二年四月十三日

勅韓縝誕彌之慶遠邇攸同眷惟外服之良來效右牽之禮言念誠恪不忘歎嘉

賜溪洞蠻人彭允宗等進奉端午布勅書元祐二年五月十日

勅彭允宗等汝族居裔壤心慕華風來修任土之儀遠效充庭之實載惟勤悃良用歎嘉

賜權陝府西路轉運判官孫路銀絹獎諭勅

書元祐二年六月二十八日為築蘭州西荆堡成下同

勅孫路宣力計臺悉心邊政相視衿要繕完保鄣訖用有成不愆于素使虜無可乘之便民有足恃之安乃眷忠勤不忘嘉歎

賜知蘭州王文郁銀絹獎諭勅書元祐二年六月二十日



日八

勅王文郁汝以禦侮之才當專城之寄百堵皆作三月而成非威服民夷身先士卒則安能以一時之役成無窮之利達于朕聽良用歎嘉

賜新除依前靜海軍節度使進封南平王李

乾德制誥勅書 元祐二年七月八日

勅朕子養兆姓囊括四荒譬之於天豈吝膏澤卿守藩滋久事上益虔高爵隆名極其榮顯庶緣天寵以服民心其思盡忠以稱恩禮

賜外任臣寮進奉坤成節銀勅書 元祐二年七月二十

日八

勅劉昌祚汝承流外服雅意本朝爰因載誕之辰遠致同寅之禮眷惟忠盡良極歎嘉

賜西南羅藩進奉敕書 元祐二年九月三十一

勅汝世為要服時欵塞垣志慕華風來修職貢載惟忠恪良用歎咨

賜諸路知州職司等并總管鈐轄至使臣初冬衣襖勅書

勅馮潔已王事靡盬日月其除屬霜露之戒寒待衣裘而卒歲宜加寵錫以示眷懷



賜諸路蕃官并溪洞蠻人初冬衣襖勅書

勅暗氊職在捍邊志常向內屬此嚴凝之候宜均輕煖之恩服我寵頒益思忠報

賜諸路屯駐泊就粮本城諸負寮等初冬衣襖都勅

勅汝等久勤外服屬戒祈寒爰念捍城之勞普均挾纊之惠

賜外任臣寮等進奉坤成節功德疏詔敕書

元祐二年九月二十四日

勅馮京職雖在外忠不忘君集勝妙之良因致壽

康之善禱眷言誠盡良極歎嘉

賜朝奉郎通判梓州趙君奭進奉坤成節無

量壽佛勅書

元祐二年九月二十四日

勅趙君奭相好妙嚴衷誠傾盡汝期乃后享無量之年吾欲斯民同極樂之世永言忠愛良用歎咨

泂路賜奉安神宗御容押班馮宗道并內臣

等銀合茶藥勅書

元祐二年十月七日

勅馮宗道逮事有年追遠不懈屬祠官之告具驂日馭以遄征往復之間忠勞亦至特加存問尚體至懷



賜五臺山十寺僧正省竒等進奉興龍節功

德疏等獎諭勅書

元祐二年十一月一日

勅省竒等清涼之域仙聖所游爰因彌月之辰來獻後天之祝永言懃至良極歎咨

賜外任臣寮曆日勅書

元祐二年十二月四日

勅韓縝朕肇修人紀祗畏天明欽若舊章式頒新曆凡我承流之寄共成平秩之功

賜于闐國黑汗王進奉登位勅書

元祐二年十二月十日

勅卿守藩西極慕義中華遠聞踐阼之新來致梯

山之貢眷言忠恪良用歎咨

賜于闐國黑汗王進奉示諭勅書

元祐二年十二月十日

勅卿遠馳信使來效貢琛載詳重譯之言深亮勤王之意益隆褒賜以荅忠誠

賜外任臣寮進奉興龍節馬勅書

元祐二年十二月十四日

勅劉永年汝職在蕃宣義均休戚旅庭稱慶因物見誠乃眷忠勤不忘嘉歎

賜溪洞彭儒武等進奉興龍節溪布勅書

元祐二年



二年十二月二十八日

敕彭儒武汝世能保境志在觀光遠修任土之宜來備充庭之實載惟忠恪良極歎嘉

賜保州團練使潞州總管王寶進奉戀闕并到任馬敕書元祐三年正月七日

敕王寶汝以選掄出分憂寄來效充庭之駿以將衛上之誠再省忠勤良深嘉歎

賜知乾寧軍內殿承制張赴獎諭敕書元祐三年四月十八日

敕張赴橫流之災所在蒙害惟吏得其人則公私賴之使者列上有司不以時聞歲月既遠予猶汝嘉故茲獎諭想宜知悉

賜于闐國黑汗王進奉示諭敕書二首元祐三年五月一日

敕卿恪居蕃守申遣使車來款塞垣恭修壤貢忠誠遠達褒歎良深

二  
敕卿守土西極馳誠中華璧馬充庭尚識漢儀之舊織皮在筐聊觀禹貢之餘載省忠勤不忘嘉歎  
賜于闐國黑汗王男被令帝英進奉敕書



身城全集卷之四十一  
一  
敕汝世敦忠厚志慕聲明遠附奏函亦馳貢篚載  
惟恭順良極歎咨

賜五臺山十寺僧正省竒已下獎諭敕書元祐三年六月十八日

敕清涼之峯仙聖所宅爰修淨供以慶誕辰再省  
恭勤不忘嘉歎

示諭武泰軍官吏軍人僧道百姓等敕書元祐三年八月十八日

敕朕以苗授賦材勇嚴馭衆整暇擢爲宿衛之長  
寵以節旄之榮惟爾邦人當諭朕意

賜殿前都虞候寧州團練使知熙州劉舜卿

進奉賀冬馬敕書元祐三年閏十月十八日

敕劉舜卿職在分憂忠存衛上屬此泰正之日遠  
輸冀產之良再省忠勤不忘嘉歎

賜外任臣寮進奉興龍節馬詔敕書元祐三年閏十月十八日

敕劉舜卿汝忠於衛上遠不忘君爰因彌月之晨  
來效充庭之實眷言勤篤良極歎嘉

賜西南蕃莫世忍等進奉敕書元祐四年正月二十一日

敕莫世忍汝守土遐陬歸誠北闕梯山修貢款塞



觀光言念忠勤至於嘉歎

賜五臺山十寺僧正省奇等獎諭敕書十月二十

五日  
下院

敕異景靈光久聞示化寶祠淨供爰慶誕彌念此  
恭勤至於嘉歎

內制口宣

雄州撫問大遼國賀興龍節使副口宣元祐元年

十月  
六日

有勅卿等遠犯風埃久勤輶傳入疆茲始授館少  
安申命撫存式昭眷獎

趙州賜大遼賀興龍節人使茶藥口宣元祐元年

十月  
六日

有勅卿等遠飭使輶來陳慶幣川塗甚阻風霧可  
虞特示至恩往頒名劑

賜正議大夫同知樞密院事安燾乞退不允

批荅口宣元祐元年  
十月十日

有勅卿被遇先帝勤勞有年逮于眇躬倚注彌重  
宜安厥位毋重力詞

賜宰臣呂公著生日禮物口宣元祐元年十  
月十六日

有敕朕之元老生以茲辰實為邦國之華豈獨聞



東坡全集卷之四十一  
門之慶故命爾息往宣余懷仍分廡庫之良以助子孫之壽

相州賜大遼國賀興龍節使副御筵口宣元祐

元祐三年十月十八日

有敕卿等遠馳信幣來慶誕辰眷言四牡之勞宜享加籩之禮式頒寵數以示至恩

趙州賜大遼國賀太皇太后正旦使副茶藥

口宣元祐元年十月二十八日

有敕卿等奉將邦幣馳會歲元眷言夙駕之勤方次中塗之館宜頒靈劑以喻至懷

趙州賜大遼國賀皇帝正旦使副茶藥口宣

元祐元年十月二十八日

有敕卿等逖修隣好方次州封言念沍寒想勒跋履特頒名劑以示眷懷

雄州白溝驛賜大遼賀正旦人使御筵口宣

元祐元年十一月二日

有敕卿等遠馳使節來慶春朝屬歲律之凝嚴涉道塗之修阻宜頒宴衍以勞勤劬

賜鎮江軍節度使判大名府韓絳詔書湯藥

口宣二首元祐元年十一月九日



有敕卿德望之隆中外所屬誠請雖極輿論未安  
母復懷歸以勤北顧特頒良劑以輔至和

二元祐元年十一月十日

有敕方面重寄無逾老成丘園歸休難遂雅意特  
頒珍劑以示至懷方此沍寒益加調養

賜新除依前中大夫守中書侍郎呂大防辭

免恩命不允斷來章批荅口宣元祐元年十一月十一日

有敕大政所關西臺爲重朕難其選無以易卿宜  
卽欽承母煩退避

賜新除中大夫守尚書右丞劉摯辭恩命不

允斷來章批荅口宣元祐元年十一月十五日

有敕卿嘉猷屢告清議所歸授受之間臣主無愧  
速起視事副朕所期

賜正議大夫同知樞密院事安燾乞外郡不

允斷來章批荅口宣元祐元年十一月十六日

有敕卿職在樞要表儀百官進當以禮退當以義  
今茲求退其義安在亟還視事母復固辭

班荆館賜大遼國賀興龍節人使赴闕口宣

元祐元年十一月二十一日

有敕卿等抗旌遠道弭節近郊乃眷勤勞良深軫



身城台集卷之四十一  
念特頒燕衍以示惠慈

班荆館賜大遼賀興龍節人使到闕酒果口

宣

元祐元年十  
二月初一日

有敕卿等肅將信幣來慶誕辰眷言行李之勞宜  
有燕休之賜受茲芳酌體我眷懷

雄州賜大遼賀正旦人使廻程御筵口宣

元祐

元年十二  
月六日

有敕卿等出疆繼好已事言還跋履冰霜憇休館  
舍宜有燕私之寵以旌來往之勤

賜河東路諸軍來年春季銀鞋兼傳宣撫問

臣寮將校口宣

元祐元年十  
二月七日

有敕汝卿等從事邊陲服勤師律方踐更於春令  
諒率履於天和特有匪頒以昭眷遇

送伴正旦使副沿路與賀北朝生日并正旦

使副相見傳宣撫問口宣

元祐元年十  
二月九日

有敕卿等方冬出使涉春在途遠犯風埃想勤跋  
履勉加鞭策卽造會朝

賜大遼賀正旦人使正月一日入賀畢就驛

御筵口宣

元祐元年十  
二月十一日

有敕卿等遠飭使輶來修舊好屬此方春之旦宜



均既醉之歡爰命燕胥以昭眷寵

就驛賜大遼賀正旦人使銀鈔鑼唾盂孟子

錦被褥等口宣

元祐元年十月十六日

有敕卿等遠馳信幣來慶春朝眷言行李之勞方茲舍館之定宜加頒賚用示寵嘉

班荆館賜大遼賀正旦人使却回御筵口宣

元祐元年十月十九日

有敕卿等遠達使辭載嚴歸駟方改轅於北道暫弭節於都門益重眷懷往伸燕餞

相州賜大遼賀正旦人使却回御筵口宣

元祐

元祐元年十二月二十二日

有敕卿等歲首奉觴禮成復命改轅北道弭節近藩宜錫宴私以彰眷寵

就驛賜大遼賀興龍節人使迴程酒果口宣

元祐元年十二月二十四日

有敕卿等抗旌旋復弭節少留風埃浩然徒馭徒止宜有珍芳之賜以昭眷寵之殊

賜大遼賀正旦人使朝辭訖就驛御筵口宣

元祐元年十二月二十五日

有敕卿等來修舊好克備多儀既陞見以告辭將